

北史

T 2455/17

221

CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE
SEP 20 1982

ChL 2455.17



CM 0	1	2	3	4	5	6	7	8	9	10	11	12	13	14	15	16	17
Lab D50 2'	95/0/2	81/0/0	66/0/0	51/0/1	35/0/0	20/0/0	29/19/54	55/-39/33	42/57/29	82/4/79	51/50/-13	50/-28/-29					
	38/14/16	66/16/18	50/-5/-22	43/-14/21	55/-9/-25	71/-32/0	62/34/60	40/9/-43	52/48/17	31/21/-21	72/-23/57	73/19/68					

Harvard College Library Imaging Services <http://imaging.harvard.edu>

北

史

李延壽北史凡一百篇總一百卷

本紀二十二卷

列傳八十八卷

哈佛大學漢和
圖書館珍藏印

及古書
毛氏

皇明崇禎十有二年歲在屠維單闕亥月重九琴川毛氏開雕

北史目錄

第一卷

本紀一

魏紀第一

第二卷

本紀二

魏紀第二

第三卷

本紀三

魏紀第三

第四卷

本紀四

魏紀第四

第五卷

本紀五

魏紀第五

第六卷

本紀六

齊紀上第六

第七卷

本紀七

齊紀中第七

第八卷

本紀八

齊紀下第八

第九卷

本紀九

周紀上第九

第十卷

本紀十

周紀下第十

第十一卷

本紀十一

隋紀上第十一

第十二卷

本紀十二

隋紀下第十二

第十三卷

列傳一

后妃上

魏神元皇后竇氏

文帝皇后封氏

桓皇后惟氏

平文皇后王氏

昭文皇后慕容氏

獻明皇后賀氏

道武皇后慕容氏

道武宣穆皇后劉氏

明元昭哀皇后姚氏

明元密皇后杜氏

太武皇后赫連氏

太武敬哀皇后賀氏

景穆恭皇后郁久間氏

文成文明皇后馮氏

文成元皇后李氏

獻文思皇后李氏

孝文貞皇后林氏

孝文廢皇后馮氏

孝文幽皇后馮氏

孝文昭皇后高氏

宣武順皇后于氏

宣武皇后高氏

宣武靈皇后胡氏

孝明皇后胡氏

孝武皇后高氏

文帝文皇后乙弗氏

文帝悼皇后郁久閭氏

廢帝皇后宇文氏

恭帝皇后若于氏

孝靜皇后高氏

第十四卷

列傳二

后妃下

齊武明皇后婁氏

蠕蠕公主郁久閭氏

彭城太妃余朱氏小余朱氏

上黨太妃韓氏

馮翊太妃鄭氏

高陽太妃游氏馮娘李娘

文襄敬皇后元氏琅邪公主

文宣皇后李氏段昭儀王嬪薛嬪

孝昭皇后元氏

武成皇后胡氏

弘德李夫人

後主皇后斛律氏

後主皇后胡氏

後主皇后穆氏

馮淑妃

周文皇后元氏

文宣皇后叱奴氏

孝閔皇后元氏

明皇后獨孤氏

武皇后阿史那氏

武皇后李氏

宣皇后楊氏

宣皇后朱氏

宣皇后陳氏

宣皇后元氏

宣皇后尉遲氏

靜皇后司馬氏

隋文獻皇后獨孤氏

宣華夫人陳氏

容華夫人蔡氏

煬愍皇后蕭氏

第十五卷

列傳三

魏諸宗室

上谷公紇羅

建德公與文
真侯陸

武陸侯因

長樂王嘉樂

望都公頽

曲陽侯素延

順陽公郁
宜都王自辰

六脩

吉陽男比干

江夏公呂
西江公敦

高涼王孤
司徒石

武衛將軍謂

淮陵侯大頭
扶風公處真

河間公齊
文安公泥

寔君

秦王翰

常山王遵

五世孫亨

陳留王虔

五世孫暉

毗陵王順

遼西公意烈

窟咄

第十六卷

列傳四

道武七王

明元六王

太武五王

第十七卷

列傳五

景穆十二王上

第十八卷

列傳六

景穆十二王下

第十九卷

列傳七

文成五王

獻文六王

孝文六王

第二十卷

列傳八

衛操

莫合

劉庫仁

弟子羅辰
羅辰曾孫仁之

尉古真

從玄孫瑾

穆崇

奚斤

叔孫建

安同

庾業延

王建

羅結

婁伏連曾孫寶

閻大肥

奚牧

和跋

莫題

賀狄干

李栗

奚眷

第二十一卷

列傳九

燕鳳

許謙

崔宏子浩

張袞弟恂

鄧彥海

第二十二卷

列傳十

長孫嵩五世孫儉
儉子平

長孫道生玄孫勿兒
從弟紹遠
兒子熾
熾弟晟
紹遠子覽

長孫肥

第二十三卷

列傳十一

于栗磾孫勁
翼子璽
翼弟義
謹子寔
寔子顯
仲文
寔弟翼
宣敏

第二十四卷

列傳十二

崔暹子頤
孫暅
玄孫罔
休
五世孫悛
悛
暹兄通

王憲曾孫昕
昕

封懿族曾孫同
回子隆之
回族弟述

第二十五卷

列傳十三

古弼

張黎

劉潔

丘堆

娥清

伊敬

乙瓌

周幾

豆代田

車伊洛

王洛兒

車路頭

盧魯元

陳建

來大千

宿石

萬安國

周觀

尉撥

陸真

呂洛拔

薛彪子子琬

尉元

慕容白曜

和其奴

苟頽

宇文福

第二十六卷

列傳十四

宋隱

從子情 弟子世良

情孫弁 弁孫欽道

世軌 翻弟世景

弁族弟翻

許彥

五世孫停

刁靡

子遵 柔

曾孫冲

辛紹先

韋閻

孫子黎

第二十七卷

列傳十五

屈遵

張蒲

谷渾

曾孫楷

公孫表

張濟

李先

賈彝

竇瑾

李訢

韓延之

表式

毛脩之

嚴稜 朱脩之

唐和

寇讚

孫儻

酈範 子道元

堯暄 孫雄

第二十八卷 列傳十六

陸俟

劉尼

第二十九卷 列傳十七

司馬休之

劉昶

蕭正表

蕭退

蕭搆

蕭大園

韓秀

柳崇

源賀 曾孫彪 玄孫師 師從叔雄

薛提

司馬楚之 曾孫喬 司馬景之 司馬叔璠 司馬天助

蕭寶寅 子贊

蕭祇

蕭泰

蕭圓蕭

第三十卷 列傳十八

盧玄 玄孫思道 昌衡 元明 潛

盧觀 弟仲宣 叔彪 弟于文偉

盧誕

盧柔 子愷

盧同 子斐 兄子景裕 景裕弟辯 光 光子賁 光從弟勇

第三十一卷 列傳十九

高允 從祖弟祐 祐曾孫德正 祐從子乾 昂 季式

第三十二卷 列傳二十

崔鑒 兄孫伯謙

崔挺 子孝芬 孫宣猷 曾孫仲方 仲方從叔昂 挺從子季舒 挺族孫暹

崔辯 孫士謙 士謙子彭 士謙弟說 說子凱度

第三十三卷 列傳二十一

李靈 曾孫元忠 渾 弟子聚 聚曾孫德饒 公緒

李孝伯 兄孫謚 謚弟子士謙

李順 玄孫元操

李喬 子子雄

李義深 弟勿廉

第三十四卷 列傳二十二

游雅 從祖弟明根 高閭

趙逸 況子瑛 胡叟

胡方回 張湛

段承根 宗欽 闕駟

劉延明 趙柔

索敞 宋繇 曾孫遊道

江式

第三十五卷 列傳二十三

王慧龍 玄孫松年 五世孫助

鄭義 孫述祖 從曾孫道邕 道邕子譚 譚叔孫儼 儼族孫偉

第三十六卷 列傳二十四

薛辯 五世孫端 端子胃 端從子濬 端從祖弟湖 湖子聰 聰子善 善弟真

薛寘 薛澄

第三十七卷 列傳二十五

韓茂 皮豹子

封敕文 呂羅漢

孔伯恭 田益宗

孟表 奚康生

楊大眼 崔延伯

李叔仁

第三十八卷 列傳二十六

裴駿 從孫敬憲 莊伯 裴延儔

裴佗 子讓之 孫矩 皇甫和

裴果 子祥 肅

裴寬

裴俠 子祥 肅

裴文舉

裴仁基

第三十九卷 列傳二十七

薛安都

劉休賓

房法壽 曾孫豹 玄孫彥謙 族子景伯

畢眾敬 曾孫義雲

羊祉 子深 孫肅 弟子敦 烈

第四十卷 列傳二十八

韓麒麟

程駿

李彪 孫昶

高道悅

甄琛

高聰

第四十一卷 列傳二十九

楊播 子侃 播弟椿 椿子昱 椿弟津 津子遁 逸 謚 謚弟悛 燕子獻 鄭頤

楊敷 子素 孫玄感 素弟約 約從叔昇 敷叔父寬 寬子文思 紀

第四十二卷 列傳三十

王肅

劉芳 孫遜 芳從子懋

常爽

第四十三卷 列傳三十一

郭祚

張彝 孫曼之 曾孫乾威

邢巒 弟子昕 族孫城 邵

李崇 從弟平 平子獎 諧

第四十四卷 列傳三十二

崔光 子劼 弟子鴻

崔亮 從弟光 詔 叔祖道固

第四十五卷 列傳三十三

裴叔業

夏侯道遷

李元護

席法友

王世弼

江悅之

淳于誕

沈文秀

張讜

李苗

劉藻

傅永

傅豎眼

張烈

李叔彪

路恃慶

房亮

曹世表

潘永基

朱元旭

第四十六卷

列傳三十四

孫紹

張普惠

成淹

范紹

劉桃符

鹿念

張燿

劉道斌

董紹

馮元興

第四十七卷

列傳三十五

袁翻

弟躍 躍子韋脩

陽尼

從孫固 固子休之 固從兄藻 藻子斐 固從兄元景

賈思伯

祖瑩

子瑛 瑛

第四十八卷

列傳三十六

朱榮

子文揚 從子兆 從弟彥伯 彥伯子敞 彥伯弟仲遠 世隆 世承 榮從父弟度律 榮從祖兄子天光

第四十九卷

列傳三十七

朱瑞

叱列延慶

斛斯椿

子徵 孫政

賈顯度

弟智

樊子鵠

侯深

賀拔允

弟勝 勝弟岳

侯莫陳悅

念賢

梁覽

雷紹

毛遐

弟鴻賢

乙弗朗

第五十卷

列傳三十八

羊雄

族祖琛 琛子術 術族子德源

楊機

高道穆

兄謙之

綦儁

山偉

宇文忠之

費穆

孟威

第五十一卷

列傳三十九

齊宗室諸王上

趙郡王琛

子徽

清河王岳

子勣

廣平公盛

陽州公永樂

襄樂王顯國

上洛王思宗

子元海 弟思好

平秦王歸彥

兄子武興王普

長樂王靈山

神武諸子

第五十二卷

列傳四十

齊宗室諸王下

文襄諸子

文宣諸子

孝昭諸子

武成諸子

後主諸子

第五十三卷

列傳四十一

万俟普

子洛

可朱渾元

劉豐

破六韓常

金祚

劉貴

蔡雋

韓賢

尉長命

王懷

任祥子胃

莫多婁貸文子敬顯

庫狄迴洛

庫狄盛

張保洛賀拔仁 趙珍 段琛 尉標 子相貴 康德

韓建業 封輔相 范舍樂 牒舍樂

侯莫陳相

薛孤延

斛律羌舉子孝卿

張瓊

宋顯

王則

慕容紹宗

叱列平

步大汗薩

薛修義

慕容儼庫狄伏連

潘樂

彭樂

暴顯

皮景和

綦連猛

元景安

獨孤永業

鮮于世榮

傅伏

第五十四卷

列傳四十二

孫騰

高隆之

司馬子如子消難 裴藻 兄子膺之

竇泰

尉景

婁昭兄子獻

庫狄干孫子文

韓軌

段榮子韶 孝言

斛律金子光 羨

第五十五卷

列傳四十三

孫奉

陳元康

杜弼子臺卿

房謨子恭懿

張纂

張亮趙起 徐遠

張曜

王峻

王紘

敬顯儁

平鑒

唐邕

白建

元文遙

趙彥深

赫連子悅

馮子琮子慈明

郎基子茂

第五十六卷

列傳四十四

魏收

魏長賢

魏季景子澹

魏蘭根族子愷

第五十七卷

列傳四十五

周宗室

邵惠公顥子什肥 導 護 叱羅協 馮惡

杞簡公連

苜莊公洛生

虞國公仲

廣川公測弟深 深子孝伯

東平公神舉弟慶

第五十八卷

列傳四十六

周室諸王

文帝十三王

孝閔帝二王

明帝三王

武帝六王

宣帝二王

第五十九卷

列傳四十七

寇洛

趙貴從祖兄善

李賢子詢 弟遠 崇孫敏 穆子暉 梁禦子膚

第六十卷 列傳四十八

李弼曾孫密

宇文貴子忻 愷

侯莫陳崇子頴 崇兄順

王雄子謙

第六十一卷 列傳四十九

王盟子勒 孫誼

獨孤信子羅

竇熾子榮定 兄子毀

賀蘭祥

叱列伏龜

閻慶子毗

史寧子雄祥

權景宣

第六十二卷 列傳五十

王羆孫長述

王思政

尉遲迥弟綱 綱子運

王軌樂運

第六十三卷 列傳五十一

周惠達

馮景

蘇綽子威 從兄亮

第六十四卷 列傳五十二

韋孝寬兄曼 曼子世康

韋墳子師

柳蚪弟愔 慶 慶子機 機子述 弟弘旦 肅 從子春之

第六十五卷 列傳五十三

達奚武

若干惠

怡峯

劉亮

王德

赫連達

韓果

蔡祐

常善

辛威

庫狄昌

梁椿

梁臺

田弘子仁恭
孫德懋

第六十六卷

列傳五十四

王傑

王勇

宇文虬

耿豪

高琳

李和子傲

伊婁穆

達奚寔

劉雄

侯植

李延孫

韋祐

陳欣

魏玄

泉介

李遷哲

楊乾運

扶猛

陽雄

席固

任果

第六十七卷

列傳五十五

崔彥穆

楊纂

段永

令狐整子熙

唐永子瑾

柳敏子昂

王士良

第六十八卷

列傳五十六

豆盧寧子勤
孫毓

楊紹子雄

王雅子世積

韓雄子禽

賀若敦子弼
弟誼

第六十九卷

列傳五十七

申徽

庫狄峙

王慶

趙昶

趙文表

楊擢

第七十卷

韓襄

張軌

郭彥

皇甫璠子誕

王子直

陸通弟逞

楊荐

趙剛子仲卿

王悅

元定

列傳五十八

趙肅子軌

李彥

梁昕

辛慶之族子昂

杜杲

呂思禮

擅翫

宗懍

柳遐子莊

徐招

孟信

劉璠子祥 兄子行本

第七十一卷

隋宗室諸王

蔡景王整

道宣王嵩

河間王弘

離石太守子崇

煬帝三子

列傳五十九

滕穆王瓚

衛昭王爽

義城公處綱

文帝四王

第七十二卷

列傳六十

高頰

牛弘

李德林

第七十三卷

列傳六十一

梁士彥

元諧

虞慶則

元胄

達奚長儒

賀婁子幹 兄詮

史萬歲

劉方 馮昱 王樹 楊武通 陳永貴 房兆

杜彥

周搖

獨孤楷 弟盛

乞伏慧

張威

和洪

陰壽 子世師 骨儀

楊義臣

第七十四卷

列傳六十二

劉昉

柳裘

皇甫績

郭衍

張衡

楊汪

裴蘊

袁充

李雄

第七十五卷

列傳六十三

趙斐

趙芬

王韶

元巖

宇文弼

伊婁謙

李圓通 陳茂

郭榮

龐晃

李安

楊尚希

張奐

蘇孝慈

元壽

第七十六卷

列傳六十四

段文振

來護兒

樊子益

周羅暉

周法尚

衛玄

劉權

李景

薛世雄

第七十七卷

列傳六十五

裴政

李謬

鮑宏

高構

榮毗

陸知命

梁毗

柳或

趙綽

杜整

第七十八卷

列傳六十六

張定和

張濟

麥鐵杖

沈光

權武

王仁恭

吐萬緒

董純

魚俱羅

王辯

陳稜

趙才

第七十九卷

列傳六十七

宇文述

雷克典 趙行樞 述子化及 司馬德賡 裴虔通

王世充

段達

第八十卷

列傳六十八

外戚

賀訥

杜超

閻毗

李惠

胡國珍

從曾孫長粲

乙弗繪

胡長仁

姚黃眉

賀迷

馮熙

高肇

楊騰

趙猛

隋文帝外家呂氏

第八十一卷

列傳六十九

儒林上

梁越

張偉

盧醜

梁祚

平恒

劉獻之

劉蘭

徐遵明

李業興

子崇祖

馮偉

劉軌思

刑時

馬敬德

子元標

權會

張彫武

郭遵

陳奇

張吾貴

孫惠蔚

族曾孫靈暉 馬子結 石耀 靈暉子萬壽

董徽

李鉉

張買奴

鮑季詳

劉晝

張景仁

張思伯

第八十二卷

列傳七十

儒林下

沈重

熊安生

辛彥之

房暉遠

劉焯

褚暉

曾世達

王孝籍

第八十三卷

文苑

温子昇

樊深

樂遜

何妥

馬光

劉炫

顧彪

張冲

列傳七十一

荀濟

祖鴻勳

樊遜

王褒

顏之推

柳普

李文博

劉臻

王貞

王胄

潘徽

第八十四卷

孝行

李廣

荀士遜

庾信

虞世基

許善心

明克讓

諸葛頴

虞綽

庾自直

常德志 尹武 劉善經 祖君彦 孔德紹 劉斌

列傳七十二

黎景熙 莫山 趙文深

蕭該 包愷

長孫慮

孫益德

楊引

吳悉達

李顯達

張昇

郭文恭

秦族

張元

楊慶

綦因

翟普林

乞伏保

董洛生

閻元明

王續生

倉跋

王崇

荆可

皇甫遐

王頌弟頌

田翼

劉仕儁

徐孝肅

華秋

第八十五卷

列傳七十三

節義

于什門

石文德

王玄威

劉渴侯

馬八龍

晁清

石祖興

王榮世

孫道登

段進

汲固

婁提

朱長生

文門愛

劉侯仁

邵洪哲

胡小彪

李几

張安祖

王閻

郭琰

沓龍超

乙速孤佛保

李棠

杜叔毗

劉弘

游元

張須陀

楊善會

盧楚

劉子翊

堯君素

陳孝意 張季珣 杜松贊

郭世儁

郎方貴

第八十六卷

列傳七十四

循吏

張膺

路邕

閻慶胤

明亮

杜纂

竇瑗

蘇淑

張華原

孟業

蘇瓊

路去病

梁彥光

樊叔略

公孫景茂

辛公義

柳儉

郭絢 敬肅

劉曠

王伽

魏德深

第八十七卷

列傳七十五

酷吏

于洛侯

胡泥

李洪之

子神

張赦提

趙霸

崔暹

邱珍

田式

燕榮

元弘嗣

王文同

第八十八卷

列傳七十六

隱逸

眭夸

馮亮

鄭脩

崔廓子頤

徐則

張文詡

第八十九卷

列傳七十七

藝術上

晁崇

張深

殷紹

王早

耿玄

劉靈助沙門靈遠

李順興擅特師

由吾道榮

顏惡頭

王春

信都芳

宋景業

許遵翹紹

吳遵世

趙輔和

皇甫玉

解法選

魏寧

綦母懷文

張子信

陸法和

蔣昇

強練

庾李才子質

盧太翼

耿詢

來和

蕭吉

楊伯醜

臨孝恭

劉祐

張胃玄

第九十卷

列傳七十八

藝術下

周澹

李脩

徐謩

從孫之才

王顯

馬嗣明

姚僧垣

褚該

許智藏

萬寶常

蔣少游

何稠

第九十一卷

列傳七十九

烈女

魏崔覽妻封氏

封卓妻劉氏

魏溥妻房氏

胡長命妻張氏

平原女子孫氏

房愛親妻崔氏

涇州貞女兒氏

姚氏婦楊氏

張洪邗妻劉氏

董景起妻張氏

陽尼妻高氏

史映周妻耿氏

任城國太妃孟氏

苟金龍妻劉氏

貞孝女宗

河東姚氏女

刁思遵妻魯氏

西魏孫道溫妻趙氏

孫神妻陳氏

隋蘭陵公主

南陽公主

襄城王恪妃

華陽王楷妃

譙國夫人沈氏

鄭善果母崔氏

孝女王舜

韓覬妻于氏

陸讓母馮氏

劉昶女

鍾士雄母蔣氏

孝婦單氏

元務光母盧氏

裴倫妻柳氏

趙元楷妻崔氏

第九十二卷 列傳八十

恩幸

王獻

王仲興 寇猛

趙脩

茹皓

趙邕

侯剛

徐紇

宗愛

仇洛齊 段霸

王琚

趙默

孫小

張宗之

劇鵬

張祐

抱疑

王遇

符承祖

王質

李堅

秦松

白整

劉騰

賈粲

楊旆

成軌

王温

孟樂

平季

封津

劉思逸

郭秀

和士開

穆提婆

高阿那肱

韓鳳

齊諸官者

第九十三卷

列傳八十一

僭偽附庸

夏 赫連氏

燕 慕容氏

後秦 姚氏

北燕 馮氏

西秦 乞伏氏

北涼 沮渠氏

梁 蕭氏

第九十四卷

列傳八十二

高麗

百濟

新羅

勿吉

奚

契丹

室韋

豆莫婁

地豆干

烏洛侯

流求

倭

第九十五卷

列傳八十三

蠻獠

林邑

赤土

真臘

婆利

第九十六卷

列傳八十四

氏

吐谷渾

宕昌

鄯至

白蘭

党項

附國

稽胡

第九十七卷 列傳八十五

西域

第九十八卷 列傳八十六

蠕蠕

匈奴宇文莫槐

徒何段就六眷

高車

第九十九卷 列傳八十七

突厥

鐵勒

第一百卷 列傳八十八

序傳

北史目錄終

北史卷一

魏本紀第一

魏之先出自黃帝軒轅氏黃帝子曰昌意昌意之少子受封北國
有大鮮卑山因以為號其後世為君長統幽都之北廣漠之野畜
牧遷徙射獵為業淳樸為俗簡易為化不為文字刻木結繩而已
時事遠近人相傳授如史官之紀錄焉黃帝以土德王北俗謂土
為托謂后為跋故以為氏其裔始均仕堯時逐女魃於弱水北人
賴其勲舜命為田祖歷三代至秦漢獯鬻獫狁山戎匈奴之屬累
代作害中州而始均之裔不交南夏是以載籍無聞積六七十代
至成皇帝諱毛立統國三十六大姓九十九威振北方成帝崩節
皇帝貸立節帝崩莊皇帝觀立莊帝崩明皇帝樓立明帝崩安皇
帝越立安帝崩宣皇帝推寅立宣帝南遷大澤方千餘里厥土昏

出吳書業 魏世國圖
魏氏重譜 氏圖中前

哈佛大學漢和
圖書館珍藏

冥沮洳謀更南徙未行而崩景皇帝利立景帝崩元皇帝侯立元
帝崩和皇帝肆立和帝崩定皇帝機立定帝崩僖皇帝蓋立僖帝
崩威皇帝僧立威帝崩獻皇帝隣立時有神人言此土荒遐宜徙
建都邑獻帝年老乃以位授子聖武皇帝命南移山谷高深九難
八阻於是欲止有神獸似馬其聲類牛導引歷年乃出始居匈奴
故地其遷徙策略多出宣獻二帝故時人並號曰推寅蓋俗云鑽
研之義

聖武皇帝諱詰汾嘗田於山澤欵見輜輶自天而下既至見美婦
人自稱天女受命相偶且日請還期年周時復會於此言終而別
及期帝至先田處果見天女以所生男授帝曰此君之子也當世
為帝王語訖而去即始祖神元皇帝也故時人諺曰詰汾皇帝無
婦家力微皇帝無舅家帝崩神元皇帝立

神元皇帝諱力微元年歲在庚子先是西部內侵依於沒鹿迴部
大人竇賓神元有雄傑之度後與賓攻西部賓軍敗失馬步走神
元使以所乘駿馬給之賓婦求馬主帝隱而不言賓後知大驚將
分國之半奉帝帝不受乃進其愛女賓猶思報恩乃從帝所欲徙
所部北居長川積數年舊部人咸來歸附及賓臨終戒其二子使
謹奉神元其子不從乃陰謀逆帝召殺之盡并其衆諸部大人悉
服控弦之士二十餘萬三十九年遷於定襄之盛樂四月祭天諸
部君長皆來助祭唯白部大人觀望不至徵而戮之遠近肅然帝
乃告諸大人為與晉和親計四十二年遣子文帝如晉且觀風土
是歲晉景元二年也文帝諱沙漠汗以國太子留洛陽後文帝以
神元春秋已高求婦晉武帝具禮護送五十六年文帝復如晉其
冬還國晉征北將軍衛瓘以文帝雄異恐為後患請留不遣復請

以金錦賂國之大人令致間隙五十八年方遣帝神元使諸部大人詣陰館迎帝酒酣帝仰視飛鳥飛丸落之時國俗無彈衆大驚相謂曰太子被服同南夏兼奇術絕人若繼國統變易舊俗吾等必不得志乃謀危害帝並先馳還曰太子引空弓而落飛鳥似得晉人異法自帝在晉後諸子愛寵神元頗有所惑及聞諸大人請因曰當便除之於是諸大人馳詣塞南矯害帝其年神元不豫烏丸王庫賢親近任勢先受衛瓘之貨欲沮動諸部因於庭中礪鉞斧曰上恨汝曹讒殺太子欲盡收諸大人長子殺之大人皆信各散走神元尋崩凡饗國五十八年年一百四歲道武卽位尊爲始祖子章皇帝悉鹿立時諸部離叛帝九年而崩弟平皇帝綽立七年而崩文帝少子思皇帝立

思皇帝諱弗政崇寬簡百姓懷服一年而崩神元子昭帝祿官立帝九年分國爲三郡一居上谷北滹源西東接宇文部自統之一居代郡之參合陂北使文帝長子桓帝諱猗靬統之一居定襄之盛樂故城使桓帝弟穆帝猗盧統之自神元以來與晉和好是歲穆帝始出并州遷雜胡北徙雲中五原朔方又西度河擊匈奴烏丸諸部自杏城以北八十里迄長城原夾道立碣與晉分界二年葬文帝及皇后封氏初思帝欲改葬未果而崩至是述成前意焉三年桓帝度漠北巡因西略諸國凡積五歲諸部降附者三十餘國桓帝英傑魁岸馬不能勝常乘安車駕大牛牛角容一石帝曾中蠱嘔吐之地仍生榆參合陂上無榆故時人異之十年匈奴別種劉元海反晉於離石自號漢王并州刺史司馬騰來乞師桓帝與帝大舉以助之大破元海衆於西河上黨桓帝與騰盟於汾東而還乃使輔相衛雄段繁於參合陂西累石爲亭樹碑以記行焉

十一年晉假桓帝大單于金印紫綬是歲桓帝崩桓帝統部凡十一年後定襄侯衛操樹碑於大邦城以頌功德子普根代立十三年昭帝崩穆帝遂總攝三部爲一統帝天安英峙勇略過人元年劉元海僭帝號自稱大漢三年晉并州刺史劉琨遣子導爲質乞師帝使弟子平文皇帝助琨破白部大人次攻鐵弗劉武晉懷帝進帝大單于封代公帝以封邑去國縣遠從琨求句注陁北地琨大喜乃徙馬邑陰館樓煩繁峙崞五縣人於陁南更立城邑盡獻其地東接代郡西連西河朔方數百里帝乃徙十萬家以充之六年城盛樂以爲北都修故平城以爲南都帝登平城西山觀望地勢乃更南百里於灑水之陽黃瓜堆築新平城晉人謂之小平城使子六修鎮之統領南部八年晉愍帝進帝爲代王置官屬食代常山二郡先是國俗寬簡至是明刑峻法諸部人多以違命得罪

凡後期者皆舉部戮之或有室家相攜悉赴死所人問何之曰當就誅其威嚴若此九年帝召六修不至怒討之失利遂崩普根先守外境聞難來攻六修滅之普根立月餘薨普根子始生桓帝后立之又薨思帝子平文皇帝立

平文皇帝諱鬱律姿質雄壯甚有威略元年歲在丁丑二年劉武據朔方來侵西部帝大破之西兼烏孫故地東吞勿吉以西控弦士馬將百萬是歲晉元帝卽位於江南劉曜僭帝位帝聞晉愍帝爲曜所害顧謂大臣曰今中原無主天其資我乎曜遣使請和帝不納三年石勒自稱趙王遣使乞和請爲兄弟帝斬其使以絕之五年晉元帝遣使韓暢加崇爵服帝絕之講武有平南夏志桓帝后以帝得衆心恐不利已子害帝遂崩大人死者數十人天興初追尊曰太祖

桓帝中子惠帝賀儻立以五年爲元年帝未親政事太后臨朝遣使與石勒通和時人謂之女國使四年帝始臨朝以諸部人情未悉款順乃築城於東木根山徙都之五年帝崩弟煬帝紇那立以五年爲元年三年石勒遣石季龍寇邊部帝禦之不利遷於大寧時平文帝長子烈帝居於舅賀蘭部帝遣使求之賀蘭部帥藹頭擁護不遣帝怒召宇文部并力擊藹頭宇文衆敗帝還大寧五年帝出居於宇文部賀蘭及諸部大人共立烈帝

烈皇帝諱翳槐以五年爲元年石勒遣使求和帝遣弟昭成帝如襄國徙者五千餘家七年藹頭不修臣職召而戮之國人復貳於是煬帝自宇文部還入諸部大人復奉之煬帝以烈帝七年爲後元年時烈帝出居於鄴三年石季龍納烈帝於大寧國人六千餘家部落叛煬帝出居於慕容部烈帝復立以煬帝三年爲後元年

城盛樂城在故城東南十里一年而崩弟昭成皇帝立

昭成皇帝諱什翼犍平文皇帝之次子也生而奇偉寬仁大度身長八尺隆準龍顏立髮委地臥則乳垂至席烈帝臨崩顧命迎帝曰立此人則社稷乃安故帝弟孤自詣鄴奉迎與帝俱還建國元年十一月帝卽位於繁峙北時年十九二年春始置百官分掌衆職東自穢貊西及破落那莫不款附五月朝諸大人於參合陂議定都灑源川連日不決乃從太后計而止娉慕容晃妹爲皇后三年春移都雲中之盛樂宮四年築盛樂城於故城南八里皇后慕容氏崩十月劉武寇西境帝遣軍大破之武死子務桓立始來婦順帝以女妻之七年二月遣大人長孫秩迎后慕容氏於和龍晃送女於境七月慕容晃遣使來聘求交婚帝許之以烈帝女妻焉十四年帝以中州紛梗將親率六軍乘石氏之亂廓定中原諸大

人諫乃止十八年太后王氏崩十九年正月劉務桓死其弟闕頭
立潛謀反二十一年闕頭部人多叛懼而東走度河半濟而水陷
後衆盡歸其兄子悉勿祈初闕頭之叛悉勿祈兄弟十二人在帝
左右盡遣之歸欲其自相猜離至是悉勿祈奪其衆闕頭窮而歸
命帝待之如初二十二年春帝東巡桑乾川四月悉勿祈死弟衛
辰立二十三年六月皇后慕容氏崩七月衛辰來會葬因求婚許
之二十五年帝南巡君子津二十八年正月衛辰謀反度河東帝
討之衛辰懼遁走三十年十月帝征衛辰時河水未成帝乃以葦
緝約漸俄然冰合乃散葦於上水草相結若浮橋衆軍利涉衛辰
與宗族西走收其部落而還三十四年春長孫斤謀反伏誅斤之
反也拔刃向御坐太子寔格之傷脇五月薨後追謚焉是爲獻明
皇帝七月皇孫珪生大赦三十九年符堅遣其大司馬苻洛帥衆

二十萬及其將朱彤張蚝鄧羌等請道來寇王師不利帝時不豫
乃率國人避於陰山之北高車雜種盡叛四面寇抄不得芻牧復
度漠南堅軍稍退乃還十二月至雲中旬有二日皇子寔君作亂
帝暴崩時年五十七道武卽位尊曰高祖帝性寬厚時國少繒帛
代人許謙盜絹二疋守者以告帝匿之謂燕鳳曰吾不忍視謙之
面卿勿洩之謙或慙而自殺爲財辱士非也帝嘗擊西部叛賊流
矢中目賊破後諸大臣執射者各持錐刀欲屠割之帝曰各爲其
主何罪也釋之其仁恕若此

太祖道武皇帝諱珪昭成皇帝之嫡孫獻明帝之子也母曰獻明
賀皇后初因遷徙游於雲澤寢夢日出室內寤而見光自牖屬天
欵然有感以建國三十四年七月七日生帝於參合陂北其夜復
有光明昭成大悅羣臣稱慶大赦告于祖宗保者以帝體重倍於

常見竊獨奇怪明年有榆生於藏胞之坎後遂成林帝弱而能言
目有光曜廣額大耳六歲而昭成崩苻堅遣將內侮將遷帝長安
賴燕鳳乃免堅軍既還國衆離散堅使劉庫仁劉衛辰分攝國事
南諸大人長孫嵩及元他等盡將故人衆南依庫仁帝於是轉在
獨孤部元年葬昭成皇帝於金陵營梓宮木材盡生成林帝雖冲
幼而疑然不羣劉庫仁常謂其子曰帝有高天下之志必興復洪
業七年十月晉敗苻堅於淮南慕容文等殺劉庫仁弟眷代攝國
部八年慕容暉弟冲僭立姚萇自稱大單于萬年秦王慕容垂僭
稱燕王九年劉庫仁子顯殺眷而代之乃將謀逆商人王霸知之
履帝足於衆中帝乃馳還是時故大人梁盆子六眷爲顯謀王盡
知其計密使部人穆宗馳告帝乃陰結舊臣長孫健元他等因幸
賀蘭部其日顯果使人殺帝不及語在獻明太后傳是歲乞伏國

仁私署秦河二州牧大單于姚萇殺苻堅堅子丕僭卽皇帝位於
晉陽

登國元年春正月戊申帝卽代王位郊天建元大會於牛川復以
長孫嵩爲南部大人以叔孫普洛爲北部大人是月慕容垂僭卽
皇帝位於中山國號燕二月幸定襄之盛樂息衆課農慕容冲爲
其部下所殺夏四月改稱魏王五月姚萇僭卽皇帝位於長安國
號大秦秋八月劉顯遣弟亢泥迎皇叔父窟咄于慕容永以兵隨
之來逼南境帝左右于桓等與諸部大人謀應之事泄誅造謀者
五人餘悉不問帝慮內難乃北踰陰山幸賀蘭部阻山爲固遣行
人安同長孫賀徵師于慕容垂垂令其子賀麟率師隨同等軍未
至而寇逼於是北部大人叔孫普洛等十三人及諸烏丸亡奔衛
辰帝自弩山幸牛川屯於延水南出代谷會賀麟於高柳大破窟

咄悉收其衆冬十月苻丕爲晉將馮該所殺慕容永僭卽皇帝位於長子十一月苻登僭卽皇帝位於隴東十二月慕容垂遣使奉帝西單于印綬封上谷王帝不納

二年夏五月遣安同徵兵於慕容垂垂遣子賀麟率衆來會六月帝親征劉顯顯奔慕容永盡收其部落冬十二月巡松漠還幸牛川

三年夏五月癸亥北征庫莫奚大破之六月乞伏國仁死其弟乾歸立私署河南王秋七月庫莫奚部帥鳩集遺散夜犯行宮縱騎撲討盡滅之八月使九原公儀於慕容垂冬十月垂遣使朝貢

四年春正月甲寅襲高車諸部落二月癸巳遂至女水討叱突隣部並大破之是月呂光自稱三河王夏五月使陳留公虔於慕容垂冬十月垂遣使朝貢

五年春三月甲申西征次鹿渾海襲高車表紇部大破之慕容垂遣子賀麟來會夏四月景寅行幸意辛山與賀麟討賀蘭紇奚諸部落大破之秋八月還幸牛川使秦王觚於慕容垂九月壬申討叱奴部囊曲水破之冬十月討高車豆陳部於狼山破之十二月帝還次白漠

六年春正月幸紐埏川三月遣九原公儀陳留公虔等西討黠弗部大破之夏四月祭天秋七月壬申講武于牛川慕容垂止秦王觚而求名馬帝絕之乃遣使於慕容永永使其大鴻臚慕容鈞奉表勸進尊號九月帝襲五原屠之收其積穀還紐埏川於柁陽塞北樹碑記功冬十月戊戌北征蠕蠕追破之於大磧南商山下十一月戊辰還幸紐埏川戊寅衛辰遣子直力鞬寇南部壬午帝大破之於鐵岐山南衛辰父子奔遯十二月滅之衛辰少子屈乞亡

奔薛于部白河以南諸部悉平收衛辰子弟宗黨無少長五千餘人盡殺之是歲起河南宮

七年春正月幸木根山遂次黑鹽池饗羣臣北之美水三月還幸河南宮秋七月行幸漠南仍築巡臺冬十一月慕容永遣使朝貢八年春正月南巡二月幸殺羊原赴白樓夏六月北巡秋七月臨幸新增先是衛辰子屈丐奔薛于部徵之不送八月帝南征薛于部屠其城九月還幸河南宮

九年春三月北巡使東平公元儀屯田於河北五原至於柵陽塞外夏五月田于河東秋七月還幸河南宮冬十月蠕蠕社喻等率部落西走是歲姚萇子興僭立殺苻登慕容垂滅永

十年秋七月慕容垂遣其子寶來寇五原八月帝親兵於河南冬十月辛未寶燒船夜遁已卯帝進軍濟河乙酉夕至參合陂景戌

大破之禽其王公以下文武將吏數千人於俘虜中擢其才識者賈彝賈閏晁宗等參謀議憲章故實十二月還幸雲中之盛樂

皇始元年春正月大蒐於定襄因東幸善無北陂三月慕容垂寇桑乾川陳留公虔死之垂遂至平城西北聞帝將至乃築城自守疾甚遂遁死於上谷子寶祕喪還至中山乃僭立夏六月丁亥皇太后賀氏崩是月葬獻明太后呂光僭稱天王國號涼秋七月左司馬許謙上書勸進尊號於是改元始建天子旌旗出警入蹕八月己亥大舉討慕容寶帝親勒六軍四十餘萬南出馬邑踰句注旌旗絡繹二千餘里鼓行而前人屋皆震別詔將軍封真等從東道襲幽州圍薊九月戊午次陽曲乘西山臨觀晉陽寶并州牧賈西王農棄城遁并州平初建臺省置百官封拜公侯將軍刺史太守尚書郎以下悉用文人帝初拓中原留心慰納諸士大夫詣軍

門者無少長皆引入人得盡言苟有微能咸蒙叙用己未詔輔國將軍奚牧略地晉川獲慕容寶丹陽王買得等於平陶城九月晉孝武帝徂冬十一月庚子朔帝至真定自常山以東守宰或捐城奔竄或稽顙軍門唯中山鄴信都三城不下別詔東平公儀攻鄴寇軍將軍王建左軍將軍李栗等攻信都軍所行不得傷桑棗戊午進軍中山己未圍之帝曰朕量寶不能出戰必憑城自守急攻則傷士久守則費糧不如先平鄴信都然後還取中山諸將稱善丁卯車駕幸魯口城

二年春正月壬戌帝引騎圍信都其夜寶冀州刺史宜都王慕容鳳踰城奔中山癸亥寶輔國將軍張驥護軍將軍徐超舉城降是月鮮卑禿髮烏孤私署大單于西平王二月丁丑帝軍于鉅鹿之柏肆場臨滹池水其夜寶悉眾犯營燎及行宮兵人駭散帝驚起

不及衣冠跣出擊鼓俄而左右及中軍將士稍集帝設奇陣列烽營外縱騎衝之寶眾大敗走還中山獲其器械數十萬計寶尚書閔亮祕書監崔暹等降者相屬賜拜職爵各有差三月己酉車駕次盧奴寶求和請送秦王觚割常山以西奉魏乞守中山以東帝許之已而寶背約辛亥車駕次中山命將圍之是夜寶弟賀麟將妻子走西山寶恐賀麟先據和龍王子夜北遁城內共立慕容普隣爲主夏四月帝以軍糧不繼詔東平公儀罷鄴圍徙屯鉅鹿五月庚子帝以中山城內爲普隣所脇乃招喻之甲辰曜兵揚威以示城內命諸軍罷圍南徙以待其變甲寅以東平公儀爲左丞相封衛王進襄城公題爵爲王秋七月普隣遣烏丸張驥率五千餘人出城求食寇靈壽賀麟自丁零中入驍軍因其眾復入中山殺普隣而自立八月景寅朔帝進軍九門時大疫人馬牛死者十五

六中山猶拒守羣下咸思北還帝知之謂曰斯固天命將若之何四海之人皆可與爲國在吾所以撫之耳何恤乎無人羣臣乃不敢言九月賀麟饑窮率三萬餘人寇新市甲子晦帝進軍討之大史令晁崇奏曰不吉帝曰何也對曰紂以甲子亡兵家忌之帝曰周武不以甲子勝乎崇無以對冬十月景宣帝進軍新市賀麟退阻泝水依漸洳澤以自固甲戌帝臨其營戰於義臺場大破之賀麟單馬走鄴慕容德殺之甲申賀麟所署公卿尚書將吏士卒降者二萬餘人其將張驥李沈慕容文等先來降尋皆亡還是日復獲之皆赦而不問獲其所傳皇帝璽綬圖書府庫珍寶中山平乙酉襄城王題薨

天興元年春正月慕容德走保滑臺衛王儀剋鄴庚子行幸真定遂幸鄴百姓有老病不能自存者詔郡縣賑卹之帝至鄴巡登臺

榭徧覽宮城將有定都之志乃置行臺遂還中山所過存問百姓詔大軍所經州郡皆復資租一年除山東入租賦之半車駕將北還發卒萬人通直道自望都鐵關鑿恒嶺至代五百餘里帝慮還後山東有變乃於中山置行臺詔衛王儀鎮之使略陽公遵鎮勃海之合口右軍將軍尹國先督租于冀州聞帝將還謀反欲襲信都安南將軍長孫嵩執送斬之辛酉車駕發中山至于望都堯山徙山東六州人吏及徒何高麗雜夷三十六署百工伎巧十餘萬口以充京師車駕次于恒山之陽博陵勃海章武諸郡羣盜並起略陽公遵等討之是月慕容德自稱燕王據廣固二月車駕至自中山幸繁峙宮更選屯衛詔給內徙新戶耕牛計口受田三月徵左丞相衛王儀還京師詔略陽公遵代鎮中山夏四月壬戌以歷陽公穆崇爲大尉鉅鹿公長孫嵩爲司徒進封略陽公遵爲常山

王南安公順爲毗陵王祭天於西郊旗幟有加焉廣平太守遼西
公意列謀反與郡人韓奇矯假識圖將襲鄴城詔反者就郡賜死
是月蘭汗殺慕容寶而自立爲大單于昌黎王六月景子詔有司
議定國號羣臣奏曰昔周秦以前帝王居所生之土及王天下卽
承爲號今國家啟基雲代應以代爲號詔曰昔朕遠祖總御幽都
控制遐國雖踐王位未定九州逮于朕躬掃平中土凶逆蕩除遐
邇率服宜仍先號爲魏秋七月遷都平城始營宮室建宗廟立社
稷慕容寶子盛殺蘭汗而自立爲長樂王八月詔有司正封畿制
郊甸端徑術樹道里平五權較五量定五度遣使循行郡國舉劾
守宰不法者親覽察黜陟之冬十月起天文殿十一月辛亥尚書
吏部郎中鄧彥海典官制立爵品定律呂_協音樂儀曹郎中董謐
撰郊廟社稷朝覲饗宴之儀三公郎中王德定律令申科禁太史

令晁崇造渾儀考天象吏部尚書崔宏總裁之閏月左丞相衛王
儀及王公卿士詣闕上書曰臣等聞宸極居中則列宿齊其晷帝
王順天則羣后仰其度伏惟陛下德協二儀道隆三五仁風被于
四海盛化塞于天區澤及昆蟲恩霑行葦謳歌所屬八表歸心而
躬履謙虛退身後已宸儀未彰袞服未御非所以上允皇天之意
下副樂推之心臣等謹昧死以聞帝三讓乃許之十二月己丑帝
臨天文殿太尉司徒進璽綬百官咸稱萬歲大赦改元追尊成帝
以下及后號謚樂用皇始之舞詔百司議定行次尚書崔宏等奏
從土德服色尚黃數用五祖以未臘以辰犧牲用白五郊立氣宣
贊時令敬授人時行夏之正徙六州二十二郡守宰豪傑吏人二
千家于代都

二年春正月甲子初祀上帝于南郊以始祖神元皇帝配降壇視

燎成禮而反乙丑赦京師始制三駕之法庚午北巡分命諸將大襲高車常山王遵三軍從東道出長川高涼王樂真等七軍從西道出牛川車駕親勒六軍從中道自馭髯水西北出二月丁亥朔諸軍同會破高車雜種三十餘部衛王儀督三將別從西北絕漠千餘里破其遺迸七部還次牛川及薄山並刻石紀功以所獲高車衆起鹿苑於南臺陰北距長城東苞白登屬之西山廣輪數十里鑿渠引武川水注之苑中疏爲三溝分流宮城內外又穿鴻雁池三月己未車駕至自北伐甲子初令五經羣書各置博士增國子太學生員三千人是月氏人李辯叛慕容德求援於鄴行臺尚書何跋以輕騎應之剋滑臺收德宮人府藏秋七月起天華殿辛酉大閱于鹿苑八月增啟京城十二門作西武庫除州郡人租賦之半辛亥詔禮官備撰衆儀著于新令范陽人盧溥聚衆海濱稱

幽州刺史攻掠郡縣殺幽州刺史封杏于是月禿髮烏孤死其弟利鹿孤立遣使朝貢冬十月太廟成遷神元平文昭成獻明皇帝神主于太廟十二月天華殿成呂光立其子紹爲天王自稱太上皇及死庶子纂殺紹而僭立

三年春正月戊午材官將軍和突破盧溥於遼西獲之及其子煥傳送京師輟之癸亥祀北郊分命諸官循行諸郡觀風俗察舉不法二月丁亥詔有司祀日於東郊始耕籍田壬寅皇子聰薨三月戊午立皇后慕容氏是月穿城南渠通於城內作東西魚池夏四月姚興遣使朝貢五月戊辰詔謁者僕射張濟使於興己巳東巡遂幸涿鹿遣使者以太牢祀帝堯帝舜廟西幸馬邑觀溫源六月庚辰朔日有蝕之秋七月乞伏乾歸大爲姚興所破壬子車駕還宮起中天殿及雲母堂金華室時太師屢奏天文錯亂帝親覽經

占多云宜改王易政於是數革官號欲以防塞凶狡消弭災變已而慮臣下疑惑冬十二月景申下詔述成敗之理整殷周之失革秦漢之弊以喻臣下是歲河右諸郡奉涼武昭王李玄盛爲秦涼二州牧涼公肇興霸業年號庚子

四年春二月丁亥命樂師入學習舞釋菜于先聖先師丁酉分命使者巡行州郡聽察辭訟糾劾不法是月呂光弟子隆弒呂纂而自立三月帝親漁薦于寢廟夏四月辛卯罷鄴行臺詔有司明揚隱逸五月起紫極殿玄武樓涼風觀石池鹿苑臺六月盧水胡沮渠蒙遜私署涼州牧張掖公秋七月詔兗州刺史長孫肥南徇許昌彭城詔賜天下鎮戍將士布帛各有差八月段興殺慕容盛叔父熙盡誅段氏僭卽皇帝位冬十二月集博士儒生比衆經文字義類相從凡四萬餘字號曰衆文經是歲涼武昭王沮渠蒙遜並

遣使朝貢

五年春正月帝聞姚興將寇邊庚寅大簡興徒詔并州諸軍積穀于平陽乾壁三月禿髮利鹿孤死夏五月姚興遣其弟義陽王平來侵平陽攻陷乾壁秋七月戊辰朔車駕西討八月乙巳至乾壁平固守進軍圍之姚興悉舉其衆來救甲子帝度蒙坑逆擊興軍大破之冬十月平赴水而死俘其餘衆三萬餘人獲興尚書左僕射狄伯支以下四品將軍以上四十餘人獲前亡臣王次多斬勒並斬以徇興頻使請和帝不許羣臣請進平蒲坂帝慮蠕蠕爲難戊申班師十一月車駕次晉陽徵湘州刺史庾岳爲司空十二月辛亥至自西征越勒莫弗率其部萬餘家內屬

六年春正月辛未朔方尉遲部別帥率萬家內屬入居雲中夏四月癸巳朔日有蝕之五月大簡興徒將略江淮秋七月鎮西大將

軍司隸校尉毗陵王順有罪以王還第戊子北巡築離宮于豺山
縱士校獵東北踰薊嶺出參合代谷九月行幸南平城規度灑南
夏屋山背黃瓜堆將建新邑辛未車駕還宮冬十月起西昭陽殿
乙卯立皇子嗣爲齊王加車騎大將軍位相國紹爲清河王加征
南大將軍熙爲陽平王曜爲河南王封故秦愍王子夔爲豫章王
陳留桓王子悅爲朱提王丁巳晉人來聘十一月庚午將軍伊謂
大破高車十二月晉桓玄廢其主司馬德宗爲平固王而自立僭
號楚

天賜元年春二月晉劉裕起兵誅桓玄三月初限縣戶不滿百罷
之夏五月罷山東諸治發州郡徒謫造兵甲秋九月帝臨昭陽殿
分置衆職引朝臣文武親自簡擢量能叙用制爵四等曰王公侯
子除伯男之號追錄舊臣加封爵各有差是秋江南大亂流人繼

負奔淮北者行道相尋冬十月辛巳天赦改元築西宮十一月幸
西宮大選臣寮令各辨宗黨保舉才行諸部子孫失業賜爵者二
千餘人

二年春正月晉主司馬德宗復位夏四月祀西郊車旗盡黑冬十
月慕容德死

三年春正月甲申北巡幸豺山宮校獵還至屋孤山二月乙亥幸
代園山建五石亭三月庚子車駕還宮夏四月庚申復幸豺山宮
占授著作郎王宜弟造兵法孤虛立城圖三百六十時遂登定襄
角史山又幸馬城甲戌車駕還宮六月發八部五百里內男丁築
灑南宮門闕高十餘丈引溝穿池廣苑圍規立外城方二十里分
置市里經途洞達三十日罷秋七月太尉穆崇薨八月甲辰行幸
豺山宮遂至青牛山景辰西登武要北原觀九十九泉造石亭遂

之右漠九月甲戌朔幸漠南鹽池壬午至漠中觀天鹽池度漠北
之吐鹽池癸巳南還長川景申臨觀長陂冬十月庚申車駕還宮
四年春二月封皇子修爲河間王處文爲長樂王連爲廣平王黎
爲京兆王夏五月北巡自參合陂東過蟠羊山大雨暴水流輜車
數百乘殺百餘人遂東北踰石漠至長川幸濡源常山王遵有罪
賜死六月赫連屈丐自稱大單于大夏天王秋七月西幸參合陂
築北宮垣三旬而罷乃還宮慕容寶養子高雲殺慕容熙而自立
僭號天王八月誅司空庾岳

五年春正月行幸豺山宮遂如參合陂觀漁于延水至甯川三月
姚興遣使朝貢秋七月戊戌朔日有蝕之冬十月禿髮儁檀僭卽
涼王位

六年夏帝不豫初帝服寒食散自太監令陰羌死後藥數動發至

此愈甚而災變屢見憂懣不安或數日不食或不寢達旦歸咎羣
下喜怒乖常謂百寮左右不可信慮如天文之占或有肘腋之虞
追思既往成敗得失終日竟夜獨語不止若傍有鬼物對揚者朝
臣至前追其舊惡便見殺害其餘或以顏色動變或以喘息不調
或以行步乖節或以言辭失措帝以爲懷惡在心變見於外乃手
自毆擊死者皆陳天安殿前於是朝野人情各懷危懼有司廢忘
莫相督攝百工偷劫盜賊公行巷里之間人爲稀少帝亦聞之曰
朕故縱之使然幸過災年當更清整之耳秋七月慕容氏支屬百
餘家謀欲外奔發覺伏誅死者三百餘人八月衛王儀謀反賜死
十月戊辰清河王紹作亂帝崩於天安殿時年三十九永興二年
九月甲寅上謚曰宣武皇帝塋於盛樂金陵廟號太祖泰常五年
改謚曰道武

太宗明元皇帝諱嗣道武皇帝之長子也母曰劉貴人登國七年生於雲中宮道武晚有男聞而大悅乃大赦帝明獻寬毅非禮不動天興六年封齊王拜相國初帝母既賜死道武召帝告曰昔漢武將立其子而殺其母不令婦人與國政汝當繼統故吾遠同漢武帝素純孝哀不自勝道武怒帝還宮哀不自止道武知而又召帝帝欲入左右諫請待和解而進帝從之及元紹之逆帝還而誅之

永興元年冬十月壬午皇帝卽位大赦改元追尊皇妣爲宣穆皇后公卿大臣先罷歸第者悉復登用之詔南平公長孫嵩北新侯安同對理人訟簡賢任能是月馮跋弒其主高雲僭號天王國號北燕閏十月丁亥朱提王悅謀反賜死詔都兵將軍山陽侯奚斤巡諸州問人疾苦十二月戊戌封衛王儀子良爲南陽王進陰平

公列爵爲王改封高涼王樂眞爲平陽王己亥帝始居西宮御天文殿蠕蠕犯塞是歲乞伏乾歸自稱秦王

二年春正月甲寅朔詔南平公長孫嵩等北征蠕蠕因留屯漢南夏五月嵩等自大漠還蠕蠕追圍之於牛川壬申帝北伐蠕蠕聞而遁走車駕還幸參合陂六月晉將劉裕滅慕容超秋七月丁巳立射臺於陂西仍講武乙丑至自北伐

三年春二月戊戌詔簡宮人非御及伎巧者悉以賜鰥人已亥詔北新侯安同等持節巡行并定二州及諸山居雜胡丁零問其疾苦察舉守宰不法者辛丑簡宮人工伎之不急者出賜人不能自存者三月己未詔侍臣常佩劔夏五月景寅復出宮人賜鰥人辛卯車駕謁金陵於盛樂己巳昌黎王慕容伯兒謀反伏誅六月姚興遣使朝貢秋七月戊申賜衛士醕三日冬十一月丁未大閱於

東郊

四年春二月癸未登獸圈射猛獸夏四月乙未宴羣臣於西宮使各獻直言勿有所諱六月乞伏乾歸爲兄子公府所弒閏月景辰大閱於東郊秋七月己巳朔東巡置四廂大將又放十二時置十二小將以山陽侯奚斤元城公屈行左右丞相己卯大獮于石會山戊子臨去畿陂觀漁庚寅至于濡源西巡幸北部諸落八月壬子幸西宮臨板殿大饗羣臣命百姓大酺二日乙卯賜王公以下至宿衛將士布各有差冬十一月己丑賜宗室近屬南陽王良以下至於總麻親布帛各有差是月沮渠蒙遜僭稱西河王十二月丁巳北巡至長城而旋

五年春正月己巳大閱畿內男年十二以上悉集己卯幸西宮頒拔大渠帥四十餘人請闕奉貢賜以繒帛錦罽各有差乙酉詔諸州六十戶出戎馬一匹庚寅大閱于東郊署將帥以山陽侯奚斤爲前軍衆三萬陽平王熙等十二將各一萬騎帝臨白登躬自校覽二月庚戌幸高柳川癸丑穿魚池於北苑庚午姚興遣使朝貢己卯詔使者巡行天下招延僑彥搜揚隱逸夏四月己卯西巡五月乙亥行幸雲中舊宮之大室景子大赦六月西幸五原校獵于骨羅山獲獸十萬秋七月己巳還幸薄山帝登觀宣武游幸刻石頌德之處乃於其旁起石壇而薦饗焉賜從者大酺於山下前軍奚斤等破越勒倍泥部落於跋那山西徙二萬餘家而旋景戌車駕自大室西南巡諸部落遂南次定襄大洛城東踰七嶺山田于善無川八月癸卯車駕還宮癸丑奚斤等班師甲寅帝臨白登山觀降人數軍實置新人於大寧給農器計口受田冬十一月癸酉大饗于西宮姚興遣使朝貢請進女帝許之

神瑞元年春正月辛酉以禎瑞頻集大赦改元辛巳行幸繁時賜
王公以下至于士卒百工布帛各有差二月戊戌車駕還宮乙卯
起豐宮於平城東北夏六月乞伏熾盤滅禿髮檀秋七月晉將
朱齡石滅蜀八月戊子詔馬邑侯元陋孫使於姚興姚興遣使朝
貢九月丁巳朔日有蝕之冬十一月壬午詔使者巡行諸州校閱
守宰資財非自家所齎悉簿為賦守宰不如法聽百姓詣闕告之
十二月景戌朔蠕蠕犯塞景甲車駕北伐

二年春正月景辰車駕至自北伐二月丁亥大饗于西宮甲辰立
宣武廟于白登西三月丁丑詔以刺史守宰率多逋倚今年貲調
縣違者謫出家財以充不聽徵發於人夏四月晉人來聘己卯北
巡五月丁亥次於參合東幸大寧丁未田于四岫山六月戊午臨
去畿陂觀漁辛酉次于濡源立蟬臺遂射白熊於頽牛山獲之丁

卯幸赤城親見長老問人疾苦復租一年南次石亭幸上谷問百
年訪賢雋復田租之半壬申幸涿鹿登嶠山觀溫泉使以太牢祠
黃帝唐堯廟癸酉幸廣寧事如上谷己卯登廣寧之歷山以太牢
祠舜廟帝親加禮焉庚辰幸代秋七月癸未車駕還宮復所過田
租之半八月庚辰晦日有蝕之九月京師人饑聽就食山東冬十
月壬子姚興使奉其西平公主至帝以后禮納之辛酉行幸沮洳
城癸亥車駕還宮景寅詔以頻遇霜旱年穀不登命出布帛倉穀
以振貧窮

泰常元年春二月丁未姚興死三月己丑長樂王處文薨夏四月
壬子大赦改元庚申河間王修薨五月甲申慧星二見六月丁巳
北巡秋七月甲申大獮於牛川登釜山臨殷繁水南觀于九十九
泉戊戌車駕還宮辛亥晦日有蝕之九月晉劉裕溯河伐姚弘遣

部將王仲德從陸道至梁城兗州刺史尉建畏懦棄守北渡仲德
遂入滑臺詔將軍叔孫建等度河曜威斬尉建於城下冬十一月
戊寅起蓬臺於北苑十二月南陽王良薨

二年春正月甲戌朔日有蝕之二月景午詔使者巡行天下觀風
俗問其所苦是月涼武昭王薨五月西巡至雲中遂濟河田于大
漠秋七月乙亥車駕還宮乙酉起白臺於城南高二十丈是月晉
劉裕滅姚弘冬十月癸丑豫章王夔薨十二月己酉詔河東河內
購泓子弟播越人間者

三年春三月晉人來聘庚戌幸西宮以勃海范陽郡去年水復其
租稅夏四月己巳徙冀定幽三州徙何於京師五月壬子東巡至
濡源及甘松遣征東將軍長孫道生帥師襲馮跋遂至龍城徙其
居人萬餘家而還秋七月戊午車駕至京師八月雁門河內大雨

水復其租稅冬十月戊辰築宮於西苑十一月赫連屈丐剋長安
十二月晉安帝殂四年春正月壬辰朔車駕臨河大蒐于犢渚癸
卯還宮三月赫連屈乞僭卽皇帝位癸丑築宮於蓬臺北夏四月
庚辰享東廟遠蕃助祭者數百國辛巳南巡幸雁門賜所過無出
今年租賦五月庚寅朔觀漁于灑水己亥車駕還宮秋八月辛未
東巡遣使祠恒岳甲申車駕還宮賜所過無出今年田租九月甲
寅築宮於白登山冬十一月丁亥朔日有蝕之十二月癸亥西巡
至雲中踰白道北獵野馬於辱孤山至于黃河從君子津西度大
狩於薛林山

五年春正月景戌朔自薛林東還至屋竇城饗勞將士大酺二日
班禽以賜之己亥車駕還宮三月景戌南陽王意文薨夏四月景
寅起灑南宮五月乙酉詔曰宣武皇帝體得一之玄遠應自然之

冲妙大行大名未盡盛美今啟緯圖始覩尊號其更上尊謚曰道
武皇帝以章靈令之先啟聖德之玄同庚戌淮南侯司馬國璠池
陽侯司馬道賜等謀反伏誅六月景寅幸翳犢山是月晉恭帝禪
位于宋秋七月丁酉西至五原丁未幸雲中大室賜從者大酺八
月癸亥車駕還宮閏月甲午陰平王烈薨是歲西涼亡

六年春二月己亥詔天下戶二千輸戎馬一匹大牛一頭三月甲
子陽平王熙薨乙亥制六部人羊滿百口者調戎馬一匹發京師
六千餘人築苑起自舊苑東苞白登周回四十餘里夏六月乙酉
北巡至于蟠羊山秋七月乙卯車駕還宮癸酉西巡獵于祚山親
射猛獸獲之遂至于河八月庚子大獮于犢渚九月庚戌車駕還
宮壬申宋人來聘冬十月己亥行幸代十二月丙申西巡于雲中
七年春正月甲辰朔自雲中西幸屋竇城賜從者大酺三日二月

景戌車駕還宮三月乙丑河南王曜薨夏四月甲戌封皇子燾為
太平王拜相國加大將軍丕為樂平王加車騎大將軍彌為安定
王加衛大將軍範為樂安王加中軍大將軍健為永昌王加撫軍
大將軍崇為建寧王加輔國大將軍俊為新興王加鎮軍大將軍
獻懷長公王子嵇敬為長樂王拜大司馬大將軍初帝服寒食散
頻年發動不堪萬機五月立太平王燾為皇太子臨朝聽政是月
宋武帝昶秋九月詔司空奚斤等帥師伐宋乙巳幸灑南宮遂如
廣甯已酉詔皇太子率百國以法駕田于東苑車乘服物皆以乘
輿之副辛亥築平城外郭周回三十二里辛酉幸嶠山遣使者祠
黃帝唐堯廟因東幸幽州見耆年問其所苦賜以爵號分遣使者
巡行州郡觀察風俗冬十月甲戌車駕還宮復所過田租之半奚
斤等濟河攻滑臺不拔求濟師帝怒不許議親南征為其聲授壬

辰南巡出自天門關踰恒嶺四方蕃附大人各帥所部從者五萬餘人十一月皇太子親統六軍鎮塞上安定王彌與北新公安同居守景午曲赦司州殊死以下景辰次于中山問人疾苦十二月景戌行幸冀州存問人俗遣壽光侯叔孫達等率眾自平原東度狗下青兗諸郡

八年春正月景辰行幸鄴存問人俗司空奚斤既平兗豫還圍武牢宋守將毛德祖距守不下蠕蠕犯塞二月戊辰築長城於長川之南起自赤城西至五原延袤二十餘里備置戍衛三月乙卯濟自靈昌夏四月丁卯幸成臯觀武牢而城內乏水縣緆汲河帝令連艦上施輶輶絕其汲路又穿地道以奪其井丁丑幸洛陽觀石經閏月丁未還幸河內北登太行幸高都已未武牢潰士眾大疫死者十二三辛酉幸晉陽班賜王公以下至於厮役五月景寅還

次雁門皇太子率留臺王公迎于句注之北庚寅車駕至自南巡六月己亥太尉宜都公穆觀薨景辰北巡至參合陂秋七月幸三會屋侯泉詔皇太子率百官以從八月幸馬邑觀于灑源九月乙亥車駕還宮冬十月癸卯廣西宮起外墻周回二十里是歲饑詔所在開倉振給十一月己巳帝崩於西宮時年三十二遺詔以司空奚斤所獲軍實賜大臣自司徒長孫嵩以下至于士卒各有差十二月庚子上謚曰明元皇帝葬于雲中金陵廟稱太宗帝兼資文武禮愛儒生好覽史傳以劉向所傳新亭說苑於經典正義多有所闕乃撰新集三十篇採諸經史該洽古義云

論曰自古帝王之興誠有天命亦賴累功積德方契靈心有魏奄宅幽方代爲君長神元生自天女桓穆勤於晉室冥符人事夫豈徒然昭成以雄傑之姿苞君人之量征伐四尅威被遐荒乃改都

立號恢隆大業終百六十載光宅區中其原故有由矣道武顯晦
安危之中屈申潛躍之際驅率遺黎奮其靈武克翦方難遂啟中
原垂拱人神顯登皇極雖冠履不暇棲遑外土而制作經謨咸出
長久所謂大人利見百姓與能抑不世之神武也而屯厄有期禍
生非慮將人事不足豈天實爲之乎明元承運之初屬廓定之始
于時狼顧鴟跂猶有窺覲加以天賜之末內難猶甚帝孝心叡略
權正兼運纂業固基內和外撫終能周鄭欵服聲教南被祖功宗
德其義良已遠矣

北史卷一

魏本紀第一終

北史卷二

魏本紀第二

世祖太武皇帝諱肅明元皇帝之長子也母曰杜貴嬪天賜五年
生於東宮體貌瓌異道武奇之曰成吾業者必此兒也泰常七年
四月封太平王五月立爲皇太子及明元帝疾命帝總攝百揆帝
聰明大度意豁如也八年十一月己巳明元帝崩壬申太子卽皇
帝位大赦天下十二月追尊皇妣爲密皇太后進司徒長孫嵩爵
爲北平王司空奚斤爲宜城王藍田公長孫幹爲平陽王其餘普
增爵位各有差於是除禁錮釋嫌疑開倉庫賑窮乏河南流人相
率內屬者甚衆

始光元年春正月景寅安定王彌薨夏四月甲辰東巡幸大寧六
月宋徐羨之弑其主義符秋七月車駕還宮八月蠕蠕六萬騎入

雲中殺略人吏攻陷盛樂帝帥輕騎討之虜乃退走九月大簡輿徒於東郊將北討冬十二月遣平陽王長孫翰等討蠕蠕車騎次祚山蠕蠕北遁諸軍追之大獲而還

二年春正月己卯車駕至自北伐三月景辰尊保母竇氏曰保太后丁巳以北平王長孫嵩爲太尉平陽王長孫翰爲司徒宜城王奚斤爲司空庚申營故東宮爲萬壽宮起永安樂二殿臨望觀九華堂初造新宇千餘夏四月詔龍驤將軍步堆使宋五月詔天下十家發大牛一頭運粟塞上秋八月赫連屈丐死九月永安安樂二殿成丁卯大饗以落之冬十月癸卯車駕北伐東西五道並出平陽王長孫翰等絕漠追寇蠕蠕北走

三年春正月壬申車駕至自北伐乞伏熾盤遣使朝貢請討赫連昌二月起太學於城東祀孔子以顏回配夏五月辛卯進中山公纂爵爲王復南安公素先爵常山王六月幸雲中舊宮謁陵廟西至五原田於陰山東至和兜山秋七月築馬射臺於長川帝親登臺走馬王公諸國君長馳射中者賜金錦繒絮各有差八月車駕還宮宋人來聘帝以赫連屈丐死諸子相攻冬十月丁巳車駕西伐幸雲中臨君子津會天暴寒數日水合十一月戊寅率輕騎襲赫連昌壬午徙萬餘家而還至祚山班虜獲以賜將士各有差十二月詔奚斤西據長安秦隴氏羌皆叛昌詣斤降武都王陽玄及沮渠蒙遜等使使內附

四年春正月乙酉車駕至自西伐賜留臺文武各有差從人在道多死到者裁十六七己亥行幸幽州赫連昌遣其弟定向長安帝聞之遣就陰山伐木造攻具二月車駕還宮三月景午詔執金吾桓貸造橋於君子津丁丑廣平王連薨夏四月丁未詔員外散騎

常侍步堆使於宋五月車駕西討赫連昌次拔隣山築城舍輜重以輕騎三萬先行戊戌至黑水帝親祈天告祖宗之靈而誓衆六月癸卯朔日有蝕之甲辰大破赫連昌昌奔上邽乙巳車駕入城虜昌羣弟及其母妹妻妾宮人數萬府庫珍寶車旗器物不可勝計辛酉班師留常山王素執金吾桓貸鎮統萬秋七月巳卯築壇於祚嶺戲馬馳射賜中者金帛繒絮各有差蠕蠕寇雲中聞破赫連昌懼而逃八月壬子車駕至自西伐飲至策勳告宗廟班軍實以賜留臺百寮各有差冬十一月以氏王楊玄爲假征南大將軍都督梁州刺史南秦王十二月行幸中山守宰貪污免者十數人癸卯車駕還宮復所過田租之半

神嘉元年春正月以天下守令多非法精選忠良悉代之辛未京兆王黎薨二月改元司空奚斤進軍安定監軍侍御史安頡出戰禽昌其餘衆立昌弟定爲主走還平涼三月辛巳侍中古弼送赫連昌至於京師司空奚斤追赫連定於平涼馬髦嶺爲定所禽將軍丘惟先在安定聞斤敗東走長安帝大怒詔頡令斬之夏四月赫連定遣使朝貢壬子西巡戊午田于河西大赦南秦王楊玄遣使朝貢五月乞伏熾盤死秋八月東幸廣甯臨觀溫泉以大牢祭黃帝堯舜廟九月車駕還宮冬十二月乙未朔日有蝕之是月行幸河西大校獵十二月甲申車駕還宮

二年夏四月宋人來聘庚寅車駕北伐五月丁未次于沙漠舍輜重輕騎兼冀馬至粟水蠕蠕震怖焚廬舍絕跡西走冬十月振旅凱旋于京師告于宗廟列置新人于漠南東至濡源西暨五原陰山竟三千里十一月西巡田于河西至祚山而還

三年春正月庚子車駕還宮壬寅大赦癸卯行幸廣甯臨溫泉作

溫泉歌二月丁卯司徒平陽王長孫翰薨戊辰車駕還宮三月壬寅進會稽公赫連昌爲秦王夏四月甲子行幸雲中敕勒萬餘落叛走詔尚書封鐵追滅之五月戊午論討敕勒功大明賞罰秋七月己亥詔諸征鎮將軍王公杖節邊遠者聽開府辟召其次增置吏員庚子詔大鴻臚卿杜超假節都督冀定相三州諸軍事行征南大將軍太宰進爵爲王鎮鄴爲諸軍節度八月宋將到彥之自清木入河泝流西行景寅彥之遣將度河攻冶坂冠軍將軍安頡督諸軍擊破之九月癸卯立密皇太后廟于鄴甲辰行幸統萬遂征平涼是月馮跋死冬十月乙卯冠軍將軍安頡濟河攻洛陽景子拔之辛巳安頡平武牢十一月己酉車駕至平涼己亥行幸安定庚子帝自安西還臨平涼遂掘塹圍守之行幸紐城安慰初附赦秦隴之人賜復七年辛酉安頡帥諸軍攻滑臺沮渠蒙遜遣使

朝貢壬寅封壽光侯叔孫建爲丹陽王十二月丁卯赫連定弟社于度洛孤面縛出降平涼收其珍寶定長安臨晉武功守將皆奔走關中平壬申車駕還東留巴東公延普等鎮安定

四年春正月壬午車駕自木根山大饗羣臣景申宋將檀道濟王仲德從清水救滑臺丹陽王叔孫建汝陰公長孫道生拒之道濟等不敢進是月赫連定滅乞伏慕末二月辛酉安頡司馬楚之平滑臺癸酉車駕還宮飲至策勳告于宗廟賜留臺百官各有差戰士賜復十年定州人饑詔開倉以振之宋將檀道濟王仲德東走三月庚戌冠軍將軍安頡獻宋俘萬餘人兵甲三萬夏六月赫連定北襲沮渠蒙遜爲吐谷渾慕瓚所執閏月乙未蠕蠕國遣使朝貢詔散騎侍郎周紹使于宋秋七月己酉行幸河西起承華宮八月己酉沮渠蒙遜遣子安周入侍吐谷渾慕瓚遣使奉表請送赫

連定巳丑以慕瓚爲大將軍封西秦王九月癸丑車駕還宮庚申
加太尉長孫嵩柱國大將軍以左光祿大夫崔浩爲司徒征西大
將軍長孫道生爲司空癸亥詔兼太常李順持節拜西河王沮渠
蒙遜爲假節加侍中都督涼州持節及西域羌戎諸軍事行征西
大將軍太傅涼州牧涼王壬申詔曰范陽盧玄博陵崔綽趙郡李
靈河間邢穎勃海高允廣平游雅太原張偉等皆賢雋之胄冠冕
州邦有羽儀之用易曰我有好爵吾與爾縻之如玄之比隱跡衡
門不曜名譽者盡敕州郡以禮發遣遂徵玄等州郡所遣至者數
百人皆差次叙用冬十月戊寅詔司徒崔浩改定律令行幸漠南
十一月景辰北部敕勒莫弗庫若于率其部數萬騎驅鹿獸數百
萬詣行在所帝因而大狩以賜從者勒石漠南以記功德宜城王
奚斤坐事降爵爲公十二月車駕還宮

延和元年春正月景午尊保太后爲皇太后立皇后赫連氏以皇
子晃爲皇太子謁于太廟大赦改元三月丁未追贈夫人賀氏爲
皇后壬申西秦王吐谷渾慕瓚送赫連定於京師夏五月宋人來
聘六月庚寅車駕伐和龍詔尚書左僕射安原等屯于漠南以備
蠕蠕辛卯詔兼散騎常侍鄧穎使於宋秋七月巳巳車駕至和龍
穿塹以守之是月築東宮九月乙卯車駕西還徙營丘成周遼東
樂浪帶方玄菟六郡人三萬家于幽州開倉以振之冬十月吐谷
渾慕瓚遣使朝貢十一月巳巳車駕至自和龍十二月巳丑馮弘
子長樂公崇及其母弟朗弟逸以遼西內屬先是辟召賢良而
州郡多逼遣之詔以禮申喻任其進退

二年春二月庚午詔兼鴻臚卿李繼持節假馮崇車騎大將軍遼
西王承制聽置尚書巳下壬午詔兼散騎常侍宋宣使於宋夏四

月沮渠蒙遜死以其子牧犍爲車騎將軍改封西河王六月遣永昌王健尚書左僕射安原督諸軍討和龍辛巳詔樂安王範發秦雍兵一萬築小城於長安城內秋八月遼西王馮崇上表求說降其父帝不聽九月宋人來聘并獻馴象一戊午詔兼大鴻臚卿崔曠持節拜征虜將軍楊難當爲征南大將軍儀同三司封南秦王冬十二月巳巳大赦天下辛未幸陰山北詔兼散騎常侍盧玄使於宋

三年春正月乙未車駕次于女水大饗羣臣戊戌馮弘遣使求和帝不許景辰南秦王楊難當尅漢中送雍州流人七千家于長安二月戊寅詔以頻年屢征有事西北運輸之役百姓勤勞令郡縣括貧富以爲三級富者租賦如常中者復二年下窮者復三年辛卯車駕還宮三月甲寅行幸河西閏月甲戌秦王赫連昌叛走景

子河西侯將格殺之驗其謀反羣弟皆伏誅巳卯車駕還宮進彭城公粟爵爲王秋七月辛巳東宮成備置屯衛三分西宮之一壬午行幸美稷遂至隰城命諸軍討山胡白龍于河西九月戊子尅之斬白龍及其將帥屠其城冬十一月車駕還宮十二月甲辰行幸雲中

太延元年春正月乙未朔日有蝕之壬午降死罪刑巳下各一等癸未出道武明元宮人令得嫁甲申大赦改元二月庚子蠕蠕焉耆車師各遣使朝貢詔長安及平涼人徙在京師其孤老不能自存者聽還鄉里丁未車駕還宮夏五月庚申進宜都公穆壽爲宜都王汝陰公長孫道生爲上黨王宜城公奚斤爲恒農王廣陵公婁伏連爲廣陵王遣使者二十輩使西域甲戌行幸雲中六月甲午詔曰去春小旱東作不茂憂勤尅巳祈請靈祇豈朕精誠有感

何報應之速雲雨震灑流澤霑渥有鄙婦人持方寸玉印詣潞縣侯孫家既而亡去莫知所在印有三字爲龍鳥之形要妙奇巧不類人迹文曰旱疫平推尋其理益神靈之報應也此者以來禎瑞仍臻甘露流液降於殿內嘉瓜合蒂生於中山野木連理殖于魏郡在先后載誕之鄉白燕集於盛樂舊都玄鳥隨之蓋有千數嘉禾頻歲合秀於恒農白兔並見於勃海白雉三隻又集於平陽太祖之廟天降嘉貺將何德以酬之其令天下大酺五日禮報百神守宰祭界內名山大川上答天意景午高麗部善國並遣使朝貢秋七月田于柵陽巳卯樂平王丕等五將東伐至和龍徙男女六千口而還八月景戌行幸河西粟特國遣使朝貢九月車駕還宮冬十月癸卯尚書左僕射安原諱以伏誅甲辰行幸定州次于新城宮十一月巳巳校獵于鹿川景子行幸鄴祀密太后廟

諸所過親問高年褒禮賢俊十二月癸卯遣使者以太牢祀北岳

二年春正月甲寅車駕還宮二月戊子馮弘遣使朝貢求送侍子帝不許壬辰遣使者十餘輩詣高麗東夷諸國詔喻之三月景辰宋人來聘辛未遣平東將軍娥清安西將軍古弼討馮弘弘求救於高麗高麗遣其大將葛蔓盧迎之夏四月甲寅皇子小兒苗兒並薨五月乙卯馮弘奔高麗戊午詔散騎常侍封撥使高麗徵送馮弘丁卯行幸河西赫連定之西也楊難當竊據上邽秋七月庚戌命樂平王丕等討之詔散騎常侍游雅使於宋八月丁亥遣使六輩使西域帝校獵于河西詔廣平公張黎發定州七郡一萬二千人通莎泉道甲辰高車國遣使朝貢九月庚戌樂平王丕等至略陽公難當奉詔攝上邽守高麗不送馮弘帝將伐之納樂平王

不計而止冬十一月己酉幸柤陽驅野馬於雲中置野馬苑閏月
壬子車駕還宮乙丑改封潁川王提爲武昌王河西王沮渠牧犍
遣使朝貢是歲吐谷渾慕瓚死

三年春正月癸未中山王纂薨戊子太尉北平王長孫嵩薨乙巳
丹陽王叔孫建薨二月乙卯行幸幽州存恤孤老問人疾苦還幸
上谷遂至代所過復田租之半三月己卯車駕還宮丁酉宋人來
聘夏五月己丑詔天下吏人得舉告守令不如法者丙申行幸雲
中秋七月戊子使永昌王健上黨王長孫道生討山胡白龍餘黨
於西河滅之八月甲辰行幸河西九月甲申車駕還宮丁酉遣使
者拜西秦王慕瓚弟慕利延爲鎮西大將軍儀同三司改封西平
王冬十月癸卯行幸雲中十一月壬申車駕還宮是歲河西王沮
渠牧犍世子封壇來朝高麗契丹龜茲悅般焉耆車師粟特疏勒

烏孫渴盤陀鄯善破洛者舌等國各遣使朝貢

四年春三月庚辰鄯善王弟素延耆來朝癸未罷沙門年五十以
下江陽王根薨是月高麗殺馮弘夏五月戊寅大赦秋七月壬申
車駕北伐冬十一月丁卯朔日有蝕之十二月車駕至自北伐上
洛巴泉輩等相帥內附詔兼散騎常侍高雅使于宋

五年春正月庚寅行幸定州三月辛未車駕還宮庚寅以故南秦
王世子楊保宗爲征南大將軍秦州牧武都王鎮上邽夏五月癸
未遮逸國獻汗血馬六月甲辰車駕西討沮渠牧犍侍中宜都王
穆壽輔皇太子決留臺事大將軍長樂王嵇敬輔國大將軍建寧
王崇二萬人屯漠南以備蠕蠕秋七月己巳車駕至上都屬國城
大饗羣臣講武馬射壬午留輜重分部諸軍八月景申車駕至姑
臧牧犍兄子祖踰城來降乃分軍圍之九月景戌牧犍與左右文

武五千人面縛軍門帝解其縛待以藩臣之禮收其城內戶口二十餘萬倉庫珍寶不可稱計進張掖公禿髮保周爵爲王與龍驤將軍穆羆安遠將軍源賀分略諸郡牧犍弟張掖太守宜得西奔酒泉太守無諱後奔晉昌樂都太守安周南奔吐谷渾戊子蠕蠕犯塞遂至七介山京都大駭皇太子命上黨王長孫道生等拒之冬十月辛酉車駕還宮徙涼州人三萬餘家于京師留樂平王丕征西將軍賀多羅鎮涼州癸亥遣張掖王禿髮保周喻諸部鮮卑保周因率諸部叛於張掖十一月乙巳宋人來聘并獻馴象一十二月壬午車駕至自西伐飲至策勲告于宗廟楊難當寇上邽鎮將元勿頭討走之是歲鄯善龜茲疎勒焉耆高麗粟特渴盤陁破郝悉半居等國並遣使朝貢

太平真君元年春正月己酉沮渠無諱圍酒泉辛亥分遣侍臣巡

行州郡觀察風俗問人疾苦二月己巳詔假通直常侍刑部使於宋發長安人五千浚昆明池三月酒泉陷夏四月戊午朔日有蝕之庚辰沮渠無諱寇張掖禿髮保周屯刪丹六月丁丑皇孫濬生大赦改元秋七月行幸陰山己丑永昌王建大破禿髮保周走之景申保太后竇氏崩于行宮癸丑保周自殺傳首京師八月甲申沮渠無諱降九月壬申車駕還宮是歲州鎮十五饑詔開倉賑恤之以河南王曜子羯兒爲河間王後改封略陽王

十年春正月癸卯拜沮渠無諱爲征西大將軍涼州牧酒泉王三月辛卯薨惠太后於淳山庚戌新興王俊略陽王羯兒有罪黜爲公辛亥封蠕蠕郁久閭乞埽爲朔方王沮渠萬年爲張掖王夏四月丁巳宋人來聘秋八月辛亥詔散騎侍郎張偉使于宋九月戊戌永昌王健薨冬十一月庚子鎮南大將軍奚眷平酒泉十二月

景子宋人來聘

三年春正月甲申帝至道壇親授符籙備法駕旗幟盡青三月壬寅北平王長孫頽有罪削爵為侯夏四月酒泉王沮渠無諱走渡流沙據鄯善涼武昭王孫李寶據敦煌遣使內附五月行幸陰山北六月景戌楊難當朝于行宮先是起殿於陰山北殿成而難當至因曰廣德焉秋八月甲戌晦日有蝕之冬十月己卯封皇子伏羅為晉王翰為秦王譚為燕王建為楚王余為吳王十二月辛巳大保襄城公盧魯元薨丁酉車駕還宮李寶遣使朝貢以寶為鎮西大將軍開府儀同三司沙州牧敦煌公

四年春正月庚午行幸中山二月景子次于恒山之陽詔有司刊石勒銘是月剋仇池三月庚申車駕還宮夏四月武都王楊保宗謀反諸將禽送京師氏羌復推保宗弟文德為主圍仇池六月庚

寅詔復人貲賦三年其田租歲輸如常牧守不得妄有徵發癸巳大閱于西郊九月辛丑行幸漠南甲辰捨輜重以輕騎襲蠕蠕分軍為四道冬十一月甲子車駕還至朔方詔曰夫陰陽有往復四時有代謝授子任賢蓋古今不易之令典也其令皇太子副理萬機總統百揆諸功臣勤勞日久皆當以爵歸第隨時朝請饗宴朕前論道陳謨而已不宜復煩以劇職更舉賢俊以備百官明為科制以稱朕心十二月辛卯車駕至自北伐

五年春正月壬寅皇太子始總百揆侍中中書監宜都王穆壽司徒東都公崔浩侍中廣平公張黎侍中建興公古弼輔太子以決庶政諸上書者皆稱臣上疏儀與表同戊申詔自王公以下至於庶人私養沙門巫及金銀工巧之人在其家者皆遣詣官曹限今年二月十五日過期不出巫沙門身死主人門誅庚戌詔自三公

已下至於卿士其子息皆詣太學其百工伎巧騶卒子息當習其父兄所業不聽私立學校違者師身死主人門誅二月辛未中山王辰等八人以北伐後期斬于都南癸酉樂平王丕薨庚辰行幸廬三月戊辰大會于邢南遣使者四輩使西域甲辰車駕還宮夏四月乙亥太宰楊平王杜超爲帳下所殺五月丁酉行幸陰山北六月西平王吐谷渾慕利延殺其兄子緯代立緯弟叱力延等來奔乞師以叱力延爲歸義王秋八月乙丑田于河西壬午詔員外散騎常侍高濟使於宋九月帝自河西至于馬邑觀于淳川己亥車駕還宮丁未行幸漠南冬十月癸未晉王伏羅大破慕利延慕利延走奔白蘭其部一萬三千內附十一月宋人來聘十二月景戊車駕還宮

六年春正月辛亥行幸定州引見長老存問之詔兼員外散騎常

侍宋愔使于宋二月遂西幸上黨觀連理樹於玄氏至吐京討徙叛胡出配郡縣三月庚申車駕還宮詔諸有疑獄皆付中書以經義量決夏六月戊子朔日有蝕之壬辰北巡秋八月壬辰散騎常侍成周公萬度歸以輕騎至鄯善執其王真達與詣京師帝大悅厚待之車駕幸陰山北次于廣德宮詔發天下兵三取一各當戒嚴以須後命徙諸種雜人五千餘家於北邊令人北徙畜牧至廣漠以餌蠕蠕壬寅征西大將軍高涼王邠等討吐谷渾慕利延軍到曼頭城慕利延驅其部落西度流沙邠急追故西秦王慕瓚世子被囊逆軍拒戰邠擊破之中山公杜豐追度三危至雪山禽被囊及慕利延元子什歸熾盤子成龍送于京師慕利延遂西入于闐國九月盧水胡蓋吳聚衆反于杏城冬十一月高涼王邠振旅還京師庚申遼東王寶漏頭薨河東蜀薛永宗聚黨入汾曲西通

蓋吳受其位號蓋吳自號天台王署百官辛未車駕還宮選六州
兵勇猛者使永昌王仁高涼王邠分領爲二道南略淮泗以北徙
青徐之人以實河北癸未西巡

七年春正月戊辰車駕自東雍禽薛永宗斬之其男女無少長皆
赴水死辛未南幸汾陰蓋吳退走北地二月景戌幸長安存問父
老丁亥幸昆明池遂田于岐山之陽所過誅與蓋吳通謀反害守
將者三月詔諸州坑沙門毀諸佛像徙長安城內工巧二千家於
京師夏四月甲申車駕至自長安戊子毀鄴城五層佛圖於泥像
中得玉璽二其文皆曰受命於天旣壽永昌其一刻其旁曰魏所
受漢傳國璽五月蓋吳復聚杏城自號秦地王景戌發司幽定冀
四州十萬人築畿上塞圍起上谷西至于河廣袤皆千里六月癸
未朔日有蝕之秋八月蓋吳爲其所殺傳首京師復略陽公

判兒王爵

八年春正月癸未行幸中山三月河西王沮渠牧犍謀反伏誅夏
五月車駕還宮六月西征諸將扶風公處真等八將坐盜沒軍資
所在虜掠贓各千萬計並斬之秋八月樂安王範薨冬十一月侍
中中書監宜都王穆壽薨十二月晉王伏羅薨

九年春正月宋人來聘二月癸卯行幸定州山東人饑詔開倉振
之罷塞圍作遂西幸上黨詔于壺關東北大王山累石爲三封又
斬其鳳凰山南足以斷之三月車駕還宮夏五月甲戌以交趾公
韓拔爲假征西將軍領護西戎校尉鄯善王鎮鄯善賦役其人比
之郡縣六月辛酉行幸廣德宮丁卯悅般國遣使求與王師俱討
蠕蠕帝許之秋八月詔中外諸軍戒嚴九月丁酉練兵于西郊景
戌幸陰山是月成周公萬度歸千里驛上大破焉耆國其王鳩尸

北史二
卑邠奔龜茲冬十月辛丑恒農王奚斤薨癸卯以婚姻奢靡喪葬
過度詔有司更爲科限癸亥大赦十二月詔成周公萬度歸自焉
耆西討龜茲皇太子朝于行宮遂從北討至受降城不見蠕蠕因
積糧城內留守而還北平王長孫敦坐事降爵爲公

十年春正月戊辰朔帝在漠南大饗百寮甲戌蠕蠕吐賀真懼遠
遁三月蒐于河西庚寅車駕還宮夏四月景申朔日有蝕之九月
閱武於磧上遂北伐冬十月庚子皇太子及羣官奉迎於行宮十
二月戊申車駕至自北伐己酉以平昌公託真爲中山王

十一年春正月乙丑行幸洛陽所過郡國皆親對高年存問孤寡
二月甲午大蒐于梁山皇子真薨是月大修宮室皇太子居于北
宮車駕遂征懸瓠夏四月癸卯車駕還宮賜從者及留臺郎吏已
上生口各有差六月己亥誅司徒崔浩辛丑北巡陰山秋七月未

將王玄謨攻滑臺八月辛亥田于河西癸未練兵於西郊九月辛
卯車駕南伐癸巳皇太子北伐屯於漠南吳王余留守京都庚子
曲赦定冀相三州死罪已下冬十月乙丑車駕濟河玄謨棄軍而
走乃命諸將分道並進車駕自中道十一月辛卯至鄒山使使者
以太牢祀孔子是月頰盾國獻師子一十二月丁卯車駕至淮詔
刈藿葦作筏數萬而濟淮南皆降癸未車駕臨江起行宮於瓜步
山諸軍同日皆臨江所過城邑莫不望塵奔潰其降附者不可勝
數甲申宋文帝使獻百牢貢其方物又請進女於皇孫以求和好
帝以師婚非禮許和而不許婚使散騎侍郎夏侯野報之帝詔皇
孫爲書致馬通問焉

正平元年春正月景戌朔大會羣臣於江上文武受爵者二百餘
人丁亥車駕北旋二月癸未次于魯口皇太子朝于行宮三月己

亥車駕至自南伐飲至策勲告于宗廟以降人五萬餘家分置近畿賜留臺文武所獲軍資生口各有差夏五月壬寅大赦六月壬戌改元車師國王遣子入侍詔以刑網太密犯者更衆命有司其案律令務求厥中自餘有不便於人者依此增損詔太子少傅游雅中書侍郎胡方回等改定律制略陽王羯兒高渠王那有罪賜死戊辰皇太子薨壬申葬景穆太子於金陵秋七月丁亥行幸陰山省諸曹吏員三分之一九月癸巳車駕還宮冬十月庚申行幸陰山宋人來聘詔殿中將軍郎法祐使於宋巳巳司空上黨王長孫道生薨十二月丁丑車駕還宮封皇孫濬爲高陽王尋以皇孫世嫡不宜在藩乃止改封秦王翰爲東平王燕王譚爲臨淮王楚王建爲廣陽王吳王余爲南安王

二年春正月庚辰朔南來降人五千餘家於中山謀叛州軍討平

之冀州刺史張掖王沮渠萬年與降人通謀賜死三月甲寅中常侍宗愛構逆帝崩於永安宮時年四十五祕不發喪愛又矯皇后令殺東平王翰迎南安王余立大赦改元爲承平尊謚曰太武皇帝葬於雲中金陵廟號世祖帝生不逮密太后及有所識言則悲慟哀感傍人明元聞而嘉歎及明元不豫衣不釋帶性清儉率素服御飲膳取給而已不好珍麗食不二味所幸昭儀貴人衣無兼綵羣臣白帝更峻京邑城隍以從周易設險之義又陳蕭何壯麗之說帝曰古人有言在德不在險屈丐蒸土築城而朕滅之豈在城也今天下未平方須人力土功之事朕所未爲蕭何之對非雅言也每以財者軍國之本無所輕費至於賞賜皆是勲績之家親戚愛寵未嘗橫有所及臨敵常與士卒同在矢石間左右死傷者相繼而帝神色自若是以人思效命所向無前命將出師指授節

度從命者無不制勝違爽者率多敗失性又知人拔士於卒伍之中唯其才效所長不論本末兼甚嚴斷明於刑賞功者賞不遺賤罪者刑不避親雖寵愛之終不虧法常曰法者朕與天下共之何敢輕也故大臣犯法無所寬假雅長聽察瞬息之間下無以措其姦隱然果於誅戮後多悔之司徒崔浩死後帝北伐時宣城公李孝伯疾篤傳者以爲卒帝聞而悼之謂左右曰李宣城可惜又曰朕向失言崔司徒可惜李宣城可哀衰貶雅意皆此類也

景穆皇帝諱晃太武皇帝之長子也母曰賀夫人延和元年正月景午立爲皇太子時年五歲明慧強識聞則不忘及長好讀經史皆通大義太武甚奇之及西征涼州皇太子監國初太武之伐河西李順等咸言姑臧無水草不可行師太子有疑色及車駕至姑臧乃詔太子曰姑臧城東西門外涌泉合於城北其大如河澤草

茂盛可供大軍數年人之多言亦可惡也太子謂宮臣曰爲人臣不實若此豈是忠乎吾初聞有疑但帝決行耳幾誤人大事言者復何面目見帝也真君四年從征蠕蠕至鹿渾谷與賊遇虜惶怖擾亂太子言於太武曰宜速進擊掩其不備尚書令劉潔固諫以爲塵盛賊多須軍大集太子曰此由賊恆擾何有營上而有此塵太武疑之遂不急擊蠕蠕遠遁旣而獲虜候騎乃云不覺官軍卒至上下惶懼北走經六七日知無追者乃徐行帝深恨之自是太子所言軍國大事多見納用遂知萬機及監國命有司使百姓有牛家以人牛相質又禁飲酒雜戲棄本沽販者於是墾田大增正平元年六月戊辰薨於東宮時年二十四庚午命持節兼太尉張黎兼司空竇瑾奉策卽柩謚景穆太子文成卽位追尊爲景穆皇帝廟號恭宗

高宗文成皇帝諱濬景穆皇帝之長子也母曰閭氏真君元年六月生於東宮帝少聰達太武常置左右號世嫡皇孫年五歲太武北巡帝從在後逢虜帥桎一奴將加罰帝謂曰奴今遭我汝宜釋之帥奉命解縛太武聞之曰此兒雖少欲以天子自處意奇之及長風格異常每參決大政可否正平二年三月中常侍宗愛弒逆立南安王余十月景午朔又賊余於是殿中尚書長孫渴侯與尚書陸麗奉迎世嫡皇孫

興安元年冬十月戊申皇帝卽位於永安前殿大赦改元正平二年爲興安以驃騎大將軍元壽樂爲太宰都督中外諸軍錄尚書事以尚書長孫渴侯爲尚書令儀同三司十一月景子二人爭權並賜死癸未廣陽王建臨淮王譚薨甲申王妣閭氏薨進平南將軍宋子侯周怵爵爲樂陵王南部尚書常安子陸麗爲平原王文

武各加位一等壬寅追尊皇考景穆太子爲景穆皇帝妣閭氏爲恭皇后尊保母常氏爲保太后十二月戊申祔葬恭皇后於金陵乙卯初復佛法丁巳以樂陵王周怵爲太尉平原王陸麗爲司徒鎮西將軍杜元寶爲司空保達沙獵等國各遣使朝貢戊寅進建業公陸侯爵爲東平王進廣平公杜遺爵爲王癸亥詔以營州蝗開倉振恤甲子太尉樂陵王周怵有罪賜死進濮陽公閭若文爵爲王

二年春正月辛巳進司空杜元寶爵爲京兆王廣平王杜遺薨進尚書僕射東安公劉尼爵爲王封建寧王崇子麗爲濟南王癸未詔與百姓雜調十五景戌進尚書西平公源賀爵爲王二月己未司空京兆王杜元寶謀反伏誅建寧王崇崇子濟南王麗爲元寶所引各賜死乙丑發京師五千人穿天泉池是月宋太子劭殺文

帝三月尊保太后爲皇太后進安豐公閻武皮爵爲河間王夏五月宋孝武帝殺太子劭而自立閏月乙亥太皇太后赫連氏崩秋七月辛亥行幸陰山濮陽王閻若文永昌王仁謀反乙卯仁賜死若文伏誅已巳車駕還宮是月築馬射臺於南郊八月戊戌詔曰朕卽位以來風雨順序邊方無事衆瑞兼呈又於苑內獲方寸玉印其文曰子孫長壽羣公卿士咸曰休哉豈朕一人克臻斯應寔由天地祖宗降祐之所致也思與兆庶共茲嘉慶其令百姓大酺三日降殊死以下囚九月壬子閱武於南郊冬十一月辛酉行幸信都中山觀察風俗十二月甲午車駕還宮復北平公長孫敦王爵是歲疎勤渴盤陘庫莫奚契丹奚賓等國各遣使朝貢

興光元年春正月乙丑以侍中河南公伊戩爲司空二月甲午帝至道壇登受圖籙禮畢曲赦京師夏六月行幸陰山秋七月景申

朔日有蝕之庚子皇子弘生辛丑大赦改元八月甲戌趙王深薨乙亥車駕還宮乙丑皇叔武頭龍頭薨九月庫莫奚國獻名馬有一角狀如麟閉都門大索三日獲姦人亡命數百人冬十一月戊戌行幸中山遂幸信都十二月景子還幸靈丘至溫泉宮庚辰車駕還宮出于叱萬單等國各遣使朝貢

太安元年春正月辛酉奉太武景穆神主于太廟樂平王拔有罪賜死二月癸未武昌王提薨三月己亥以太武景穆神主入太廟改元曲赦京師死囚已下夏六月壬戌詔名皇子弘曲赦癸酉詔尚書穆真等二十人巡行州郡觀察風俗大明賞罰冬十月庚午以遼西公常英爲太宰進爵爲王是歲遮逸波斯疎勒等國各遣使朝貢

二年春正月乙卯立皇后馮氏二月丁巳立皇子弘爲皇太子大

赦夏六月羽林中郎于判元提等謀逆誅秋八月田于河西平西將軍漁陽公尉眷北擊伊吾剋其城大獲而還九月辛巳進河東公閭毗零陵公閭紇爵並爲王冬十月甲申車駕還宮甲午曲赦京師十一月改封西平王源賀隴西王嘍噠普嵐等國各遣使朝貢

三年春正月徵漁陽公尉眷拜太尉進爵爲王錄尚書事夏五月封皇弟新成爲陽平王六月癸卯行幸陰山秋八月田於陰山之北巳亥還宮冬十月將冬巡詔太宰常英起行宮於遼西黃山十一月州鎮五蝗百姓饑使開倉振給之是歲粟特于闐等五十餘國並遣使朝貢

四年春正月景午朔初設酒禁乙卯行幸廣寧溫泉宮遂東巡庚午至遼西黃山宮遊宴數日親對高年勞問疾苦二月景子登碣

石山觀滄海大饗羣臣於山上班賞進爵各有差改碣石山爲樂遊山築壇記行於海濱戊寅南幸信都田於廣川三月丁未觀馬射於中山所過郡國賜復一年景辰車駕還宮起太華殿乙丑東平王陸侯薨夏五月壬戌詔曰比年以來雜調減省而所在州郡咸有逋懸非在職之官綏導失所貪穢過度誰使之然自今常調不充人不安業宰人之徒加以死罪六月景申田於松山秋七月庚午行幸河西九月丁巳還宮辛亥太華殿成景寅饗羣臣大赦冬十月甲戌北巡至陰山有故冢毀廢詔曰昔姬文塋枯骨天下歸仁自今有穿墳隴者斬之辛卯次于車輪山累石記行十一月車駕渡漠蠕蠕絕跡遠遁十二月中山王託真薨

五年春二月巳酉司空河南公伊馘薨三月庚寅曲赦京師死罪巳下夏四月乙巳封皇弟子推爲京兆王五月常居國遣使朝貢

六月戊申行幸陰山秋八月庚戌遂幸雲中壬戌還宮九月戊辰儀同三司敦煌公李寶薨冬十二月戊申詔以六鎮雲中高平二雍秦州徧遇災早年穀不收開倉振乏有徙流者喻還桑梓

和平元年春正月甲子朔大赦改元庚午詔散騎侍郎馮闡使於宋夏四月戊戌皇太后常氏崩於壽安宮五月癸酉葬昭太后於廣寧鳴雞山六月甲午詔征西大將軍陽平王新成等討吐谷渾什寅崔浩之誅也史官遂廢至是復置秋七月西征諸軍至西平什寅走保南山九月庚申朔日有蝕之是月諸軍濟河追什寅遇瘴氣多病疫乃引還庚午車駕還宮冬十月居常王獻馴象三十一月詔散騎侍郎盧度世使於宋

二年春正月乙酉詔曰刺史牧人爲萬里之表自頃每因發調逼人假貸大商富賈要射時利上下通同分以潤屋爲政之弊莫過

於此其一切禁絕犯者十死以上皆死布告天下咸令知禁二月行幸中山遂幸信都三月宋人來聘車駕所過皆親對高年問疾苦詔年八十一子不從役靈丘南有山高四百餘丈乃詔羣臣仰射山峯無能踰者帝彎弧發矢出三十餘丈過山南二百二十步遂刊石勒銘是月發并肆州五千餘人修河西獵道辛巳車駕還宮夏四月乙未河東王閻毗薨五月癸未詔南部尚書黃盧頭李敷業考課諸州秋七月戊寅封皇弟小新成爲濟陰王天賜爲汝陰王萬壽爲樂良王洛侯爲廣平王八月波斯國遣使朝貢冬十月詔假員外散騎常侍游明根使于宋廣平王洛侯薨

三年春正月壬午以東郡公乙渾爲太源王癸未樂良王萬壽薨二月壬子朔日有蝕之癸酉田於崞山遂觀漁于旋鴻池三月甲申宋人來聘高麗徙王契嚙思厭於師疏勒石那悉居半渴盤陀

等國並遣使朝貢夏六月庚申行幸陰山秋七月壬寅幸行河西
九月壬辰常山王素薨冬十月詔員外散騎常侍游明根使于宋
十一月壬寅車駕還宮十二月乙卯制戰陣之法十有餘條因大
讎曜兵有飛龍騰蛇魚麗之變以示威武戊午零陵王閻拔薨

四年春三月乙未賜京師人年七十以上太官廚食以終其年皇
子胡仁薨追封樂陵王夏四月癸亥上幸西苑親射猛獸三頭五
月壬辰侍中漁陽王尉眷薨壬寅行幸陰山秋七月壬午詔曰朕
每歲開月命羣臣講武所幸之處必立宮壇糜費之功勞損非一
宜仍舊貫何必改作也八月景寅遂田于河西九月辛巳車駕還
宮冬十月以定相二州實霜傷稼免其田租詔員外散騎常侍游
明根使于宋十二月辛丑詔以喪葬嫁娶大禮未備命有司爲之
條格使貴賤有章上下咸序著之于令壬寅詔曰婚姻者人道之

始比者以來貴族之門多不率法或貪利財賂或因緣私好在於
苟合無所擇選塵穢清化虧損人倫將何以宣示典謨垂之來裔
今制皇族師傅王公侯伯及士庶之家不得與百工伎巧卑姓爲
婚犯者加罪

五年春正月丁亥封皇弟雲爲任城王二月詔以州鎮十四去歲
蟲水開倉振恤夏四月癸卯進封頓丘公李峻爲王閏月戊子帝
以旱故減膳責身是夜澍雨大降五月宋孝武帝殂六月丁亥行
幸陰山秋七月壬寅行幸河西九月辛丑車駕還宮冬十月琅邪
侯司馬楚之薨十二月南秦王楊難當薨吐呼羅國遣使朝貢

六年春正月景申大赦二月丁丑行幸樓煩宮高麗王對曼等
國各遣使朝貢三月戊戌相州刺史西平郡王吐谷渾權薨乙巳
車駕還宮夏四月破洛那國獻汗血馬普嵐國獻寶劍五月癸卯

帝崩于太華殿時年二十六六月景寅奉尊謚曰文成皇帝廟號高宗八月葬雲中之金陵

顯祖獻文皇帝諱弘文成皇帝之長子也母曰李貴人興光元年七月生於陰山之北太安二年二月立爲皇太子和平六年五月甲辰卽皇帝位大赦尊皇后曰皇太后車騎大將軍乙渾矯詔殺尚書楊保年平陽公賈愛仁南陽公張天度于禁中戊申司徒公平元王陸麗自湯泉入朝又殺之己酉以渾爲太尉公以錄尚書事東安王劉尼爲司徒公以尚書左僕射和其奴爲司空公六月封繁陽侯李嶷爲丹陽王征東大將軍馮熙爲昌黎王秋七月癸巳以太尉乙渾爲丞相位居諸王上事無大小皆決焉九月庚子曲赦京師丙午詔曰先朝以州牧親人宜置良佐故敕有司班九條之制使前政選吏以待後人然牧司舉非其人憊于典廢令制

刺史守宰到官之日仰自舉人望忠信以爲選官不論前政共相平置若簡任失所以罔上論是月宋義陽王劉昶自彭城來奔冬十月徵陽平王新成京兆王子推濟陰王小新成汝陰王天賜任城王雲入朝十一月宋湘東王彧殺其王子業而自立

天安元年春正月己丑朔大赦改元二月庚申丞相太原王乙渾謀反伏誅乙亥以侍中元孔雀爲濮陽王侍中陸定國爲陳郡王三月庚子以隴西王源賀爲太尉公辛丑高宗文成皇帝神主祔于太廟辛亥帝幸道壇親受符籙曲赦京師秋九月己酉初立鄉學郡置博士二人助教二人學生六十人冬十二月皇弟安平王薨是歲州鎮十一旱人饑開倉振恤

皇興元年春正月癸巳鎮南大將軍尉元大破宋將張永沈攸之於呂梁東宋人來聘庚子東平王道符謀反於長安其司馬段大

陽斬之傳首京師道符兄弟皆伏誅閏月以頓丘王李峻爲太宰
二月濟陰王小新成薨宋東平太守申纂戍無鹽邊絕王使詔征
南大將軍慕容白曜督諸軍往討三月甲寅尅之秋八月丁酉幸
武州山石窟寺戊申皇子宏生大赦改元九月己巳進馮翊公李
白爲梁郡王冬十月己亥朔日有蝕之癸卯田於鄆男池濮陽王
孔雀坐怠慢降爲公

二年春二月癸未田于西山親射武豹三月慕容白曜進圍東陽
戊午宋人來聘夏四月景子朔日有蝕之辛丑進南郡公李惠爵
爲王五月乙卯田于陰山遂幸繁峙辛酉車駕還宮六月庚辰以
河南開地曲赦京師殊死以下以昌黎王馮熙爲太傅秋九月辛
亥封皇叔禎爲南安王長壽爲城陽王太洛爲章武王休爲安定
王冬十月癸酉朔日有蝕之辛丑田于冷泉十一月州鎮二十七

永旱詔開倉振恤十二月甲午詔曰頃張永敢拒王威暴骨原隰
天下之人一也其永軍殘廢之士聽還江南露骸草葬者敕州縣
收瘞之

三年春正月乙丑東陽潰虜沈文秀戊辰司空平昌公和其奴薨
二月己卯進上黨公慕容白曜爵爲濟南王夏四月壬辰宋人來
聘景申名皇子宏大赦丁酉田于崞山五月徙青齊人于京師六
月辛未立皇子宏爲皇太子冬十月丁酉朔日有蝕之是月太宰
頓丘王李峻薨十一月進襄城公韓頽爵爲王

四年春正月州鎮大饑詔開倉振恤二月以東郡王陸定國爲司
空公詔征西大將軍上黨王長孫觀討吐谷渾什寅廣陽王石侯
薨三月景戌詔天下人病者所在官司遣醫就家診視所須藥任
醫所量給之夏四月辛丑大赦戊申長孫觀軍至曼頭山大破什

寅五月封皇弟長樂爲建昌王六月宋人來聘秋八月蠕蠕犯塞
九月景寅車駕北伐諸將俱會于女水大破虜軍司徒東安公劉
尼坐事免壬申車駕至自北伐飲至策勲告于宗廟冬十月誅濟
南王慕容白曜高平公李敷十一月詔弛山澤禁十二月甲辰幸
鹿野苑石窟寺陽平王新成薨

五年春二月乙亥詔假員外散騎常侍邢祐使於宋夏四月北平
王長孫敦薨六月丁未行幸河西秋七月景寅遂至陰山八月丁
亥車駕還宮帝幼而神武聰敏機悟有濟人之規仁孝純至禮敬
師友及卽位雅薄時務常有遺世之心欲禪位于叔父京兆王子推
羣臣固請乃止景午使太保建安王陸馥太尉源賀奉皇帝璽綬
冊命皇太子升帝位於是羣公奏上尊號太上皇帝己酉太上皇
帝徙御崇光宮米椽不斷土堦而已國之大事咸以聞承明元年

文明太后有憾帝崩於永安殿年二十三上尊謚曰獻文皇帝廟
號顯祖塋雲中金陵

論曰太武聰明雄斷威靈傑立藉二世之資奮征伐之氣遂戎軋
四出周旋夷險平秦隴掃統萬翦遼海蕩河源南夷荷擔北蠕絕
迹廓定四表混一華戎其爲武功也大矣遂使有魏之業光邁百
王豈非神叡經綸事當命世至於初則東儲不終末乃豐成所忽
固本貽防殆弗思乎景穆明德令聞夙世俎天其兵園之悼歎文
成屬太武之後內頗虛耗旣而國豐時艱朝野楚楚帝與時消息
靜以鎮之養威布德懷緝中外自非機悟深裕矜濟爲心亦何能
若此可謂有君人之度矣獻文聰敏夙成兼資雄斷故能更清漠
野大啟南服而早有厭世之心終致宮闈之變將天意也

北史卷二

本紀第二終

北史卷三

魏本紀第三

高祖孝文皇帝諱宏獻文皇帝之太子也母曰李夫人皇興元年八月戊申生於平城紫宮神光照室天地氛氲和氣充塞帝潔白有異姿襁褓岐嶷長而弘裕仁孝綽然有人君之表獻文尤愛異之三年六月辛未立為皇太子五年受禪延興元年秋八月景午皇帝即位於太華前殿改皇興五年為延興丁未宋人來聘九月壬戌詔在位及人庶進直言壬午青州高陽人封辯聚黨自號齊王州軍討平之冬十月丁亥沃野統萬二鎮敕勒叛詔太尉隴西王源賀追擊至枹罕滅之徙其遺迸於冀定相三州為營戶十二月乙酉封駙馬都尉穆亮為趙郡王壬辰詔求舜後獲東萊人媯苟之復其家畢世以彰盛德之不朽復前濮陽王孔雀本封辛丑

再從世圖尊古天書高宗
氏雷而南未明氏重謹

徙趙郡王穆亮爲長樂王癸卯日有蝕之

二年春正月大陽蠻酋桓誕率戶內屬拜征南將軍封襄陽王曲赦京師及河西南至秦涇西至枹罕北至涼州及諸鎮詔假員外散騎常侍邢佑使於宋二月丁巳詔曰頃者淮徐兖賓尼父廟隔非所致令祠典寢頓禮章殄滅遂使女巫妖覲淫進非禮自今有祭孔廟制用酒脯而已不聽婦女雜合以祈非望之福犯者以違制論其公家有事自如常禮蠕蠕犯塞太上皇帝次於北郊詔諸將討之虜遁走北部敕勒叛奔蠕蠕太上皇帝追至石磧不及而還三月戊辰以散騎常侍駙馬都尉萬安國爲大司馬大將軍封安城王庚午親耕籍田連川敕勒謀叛徙配青徐齊兗四州爲戶夏四月庚子詔工商雜伎盡聽赴農諸州課人益種萊果辛亥宋人來聘癸酉詔沙門不得去寺行者以公文是月宋明帝殂五月

丁巳詔軍警給璽印傳符次給馬印六月安州遭水雹詔丐租振恤景申詔今年貢舉尤爲猥濫自今所遣皆可門盡州郡之高才極鄉閭之選戊午行幸陰山秋七月壬寅詔州郡縣各遣二人才堪專對者赴九月講武當親問風俗八月百濟遣使請兵伐高麗九月辛巳車駕還宮戊申統萬鎮將河間王閻武皮坐貪殘賜死巳酉詔以州鎮十一水旱丐其田租開倉振恤又詔流逆之人皆令還本違者徙邊冬十月蠕蠕犯塞及五原十一月太上皇帝親討之將度漠蠕蠕聞之北走數千里丁亥封皇叔略爲廣川王壬辰分遣使者巡省風俗問人疾苦帝每月一朝崇光宮十二月庚戌詔曰頃者呂來官以勞升未久而代牧守無恤人之心競爲聚歛送故迎新相屬於路非所以固人志隆政道也自今牧守溫良仁儉克已奉公者可久於其任歲積有成遷位一級其貪殘非道

侵削黎庶者雖在官甫爾必加黜罰著之於令以爲彛準詔以代郡事同豐沛代人先配邊戍者免之是歲高麗地豆千庫莫奚高昌等國並遣使朝貢

三年春正月庚辰詔員外散騎常侍崔演使於宋丁亥改崇光宮爲寧光宮二月戊午太上皇帝至自北討飲至策勳告于宗廟甲戌詔縣令能靜一縣劫盜者兼理二縣卽食其祿能靜二縣者三年遷爲郡守二千石能靜二郡上至三郡亦如之三年遷爲刺史三月壬午詔諸倉屯穀麥充積者出賜貧人夏四月戊申詔假司空上黨王長孫觀等討吐谷渾拾寅王子詔以孔子二十八世孫魯郡孔乘爲崇聖大夫給十戶以供灑掃六月甲子詔曰往年縣召秀才二人問守宰善惡而賞者未幾罪者衆多肆法傷生情所未忍諸爲人所列者特原其罪盡可代之秋七月詔河南六州人

戶收絹一匹綿一斤租三十石乙亥行幸陰山八月庚申帝從太上皇帝幸河西拾寅謝罪請降許之九月辛巳車駕還宮乙亥宋人來聘己亥詔曰今京師及天下囚未判在獄致死無近親者給衣衾棺槨葬之不得暴露辛丑詔遣十使循行州郡檢括戶口冬十月太上皇帝將南討詔州郡之人十丁取一充行戶租五十石以備軍糧十一月戊寅詔以河南州郡牧守多不奉法致新邦百姓莫能上達遣使者觀風察獄黜陟幽明搜揚振恤癸巳太上皇帝南巡至懷州所過問人疾苦賜高年孝悌力田布帛十二月癸卯朔日有蝕之庚戌詔關外苑囿聽人樵採是歲高麗契丹庫莫奚悉萬斤等國並遣使朝貢州鎮十一水旱丐人田租開倉振恤相州人餓死者二十八百四十五人祆人劉舉自稱天子齊州刺史武昌王平原捕斬之

四年春正月癸酉朔日有蝕之丁丑太尉隴西王源賀以病辭位
二月甲辰太上皇帝至自南巡辛未禁寒食三月丁亥詔員外散
騎常侍許赤武使於宋夏四月丁卯詔自今非謀反大逆干紀外
奔罪止其身而已秋七月己卯曲赦仇池八月戊申大閱於北郊
九月以宋亂故詔將軍元蘭等伐蜀漢冬十月庚子宋人來聘十
一月分遣侍臣循河南七州觀察風俗撫慰初附是歲粟特救勒
吐谷渾高麗曹利潤悉契丹庫莫奚地豆干等國並遣使朝貢州
鎮十三大饒巧人田租開倉振之

五年春二月癸丑詔定考課明黜陟夏四月詔禁畜鷹鷂開相告
之制五月景午詔員外散騎常侍許赤武使於宋丁未幸武州山
辛酉幸車輪山六月庚午禁殺牛馬壬申曲赦京師死罪遣備蠕
蠕秋九月癸卯洛州人賈伯奴稱恒農王豫州人田智度稱上洛

王郡討平之冬十月太上皇帝大閱於北郊十二月景寅改封建
昌王長樂爲安樂王己丑城陽王長壽薨庚寅宋人來聘是歲高
麗吐谷渾龜茲契丹庫莫奚地豆干蠕蠕等國並遣使朝貢

承明元年春二月司空東郡王陸定國坐事免官爵爲兵夏五月
冀州人宋伏龍聚衆自稱南平王郡縣捕斬之六月甲子詔中外
戒嚴分京師見兵爲二等第一軍出遣第一兵二等亦如之辛未
太上皇帝崩壬申大赦改元大司馬大將軍安城王萬安國坐法
賜死戊寅以征西大將軍安樂王長樂爲太尉尚書左僕射南平
公日辰爲司徒進封宜都王以南部尚書李訢爲司空尊皇太后
爲太皇太后臨朝稱制秋七月甲辰追尊皇妣李貴人爲思皇后
濮陽王孔雀有罪賜死八月甲子詔羣公卿士有使人益國者具
狀以聞甲戌以長安二蠶多死丐人歲賦之半九月丁亥曲赦京

師冬十月丁巳起七寶永安行殿乙丑進假東陽王丕爵爲王已未詔羣官卿士下及吏人各聽上書直言極諫勿有所隱諸有益政利人可以正風俗者有司以聞辛未幸建明佛寺大宥罪人進濟南公羅拔爲王是歲蠕蠕高麗庫莫奚波斯契丹宕昌悉萬斤等國並遣使朝貢

太和元年春正月乙酉改元辛亥起太和安昌二殿巴西秦州略陽人王元壽聚衆自號衝天王雲中饒開倉振恤二月辛未秦益二州刺史武都公尉洛侯討破王元壽三月庚子以雍州刺史東陽王丕爲司徒景午詔曰去年牛疫死傷大半今東作旣興人須肄業其敕在所督課田農有牛者加勤於常歲無牛者倍庸於餘年一夫制田四十畝中男二十畝無令人有餘力地有遺利夏四月樂安王良薨詔復前東郡王陸定國官爵五月車駕祈雨於武

州山俄而澍雨大洽秋七月壬辰京兆王子推薨庚子定三等死刑巳酉起朱明恩賢門是月宋人殺其主昱八月壬子大赦景子詔曰工商息隸各有厥分而有司縱濫或染清流自今戶內有工役者唯止本部丞巳下準次而授若階藉元勳以勞定國者不從此制戊寅宋人來聘九月乙酉詔羣臣定律令於太華殿庚子起永樂遊觀殿於北苑穿神泉池冬十月辛亥朔日有蝕之癸酉宴京邑耆老年七十巳上於太華殿賜以衣服詔七十巳上一子不從役宋葭蘆戍主楊文度遣弟鼠襲陷仇池十一月丁亥懷州人伊祁苟自稱堯後應王聚衆於重山洛州刺史馮熙討平之閏月庚午詔員外散騎常侍李長仁使於宋十二月壬寅征西將軍皮喜攻陷葭蘆斬楊文度傳首京師丁未州郡八水旱蝗人饒詔開倉振恤是歲高麗契丹庫莫奚蠕蠕車多羅西天竺舍衛疊伏羅

宋楊婆員闕等國並遣使朝貢

二月春正月丁巳封昌黎王馮熙第二子始興爲北平王二月丁亥行幸代之湯泉所過問人疾苦以宮女賜貧人無妻者癸卯車駕還宮乙酉晦日有蝕之三月景子以河南公梁彌機爲宕昌王夏四月己丑宋人來聘京師早甲辰祈天災於北苑親自禮焉減膳避正殿景午澍雨大洽曲赦京師五月詔曰廼者人漸奢尚婚葬越軌又皇族貴戚及士庶之家不惟氏族高下與非類婚偶先帝親發明詔爲之科禁而百姓習常仍不肅改朕念憲章舊典永爲定準犯者以違制論六月庚子皇叔若薨秋八月分遣使者考察守宰問人疾苦景戌詔罷諸州禽獸之貢九月乙巳朔日有蝕之景辰曲赦京師冬十月壬辰詔員外散騎常侍鄭發一作發使於宋十二月癸巳誅南郡王李惠是歲龜茲國獻名馳龍馬珍寶甚衆吐

谷渾蠕蠕勿吉等國並遣使朝貴州鎮二十餘水旱人饑詔開倉振恤

二年春正月癸丑以德六合殿成庚申詔罷行察官二月辛巳帝太皇太后幸代郡湯泉問人疾苦鰥寡貧者妻以宮女己亥還宮三月癸卯朔日有蝕之甲辰曲赦京師夏四月壬申宋人來聘癸未樂良王樂平薨甲午宋順帝禪位于齊庚子進淮陽公尉元爵爲王宜都王日辰有罪賜死五月丁巳帝祈雨於北苑閉陽門是日澍雨大洽六月辛未以雍州人饑開倉振恤起文石室靈泉殿於方山秋七月壬寅詔免宮人年老及病者八月壬申詔羣臣進直言乙亥幸方山起思遠佛寺丁丑還宮九月壬子以司徒東陽王丕爲太尉趙郡公陳建爲司徒進爵魏郡王河南公苟頽爲司空進爵河東王進太原公王叡中山王隴東公張祐新平王乙未

定州刺史安樂王長樂有罪賜死庚申隴西王源賀薨冬十月己巳朔大赦十一月癸卯賜京師貧窮高年疾患不能自存衣服布帛各有差癸丑進假梁郡公元嘉爵爲假王督二將出淮陰隴西公元琛三將出廣陵河東公薛豹子三將出廣固至壽春是歲吐谷渾高麗蠕蠕地豆于契丹庫莫奚龜茲粟特州逸河龔疊伏羅員關悉萬斤等國各遣使朝貢

四年春正月癸卯乾象六合殿成乙卯廣川王略薨丁巳罷畜鷹鷄之所以其地爲報德佛寺戊午襄城王韓頽有罪削爵徙邊二月癸巳以旱故詔天下祀山川羣神及能興雲雨者修飾祠堂薦以牲璧人有疾苦所在存問夏四月乙卯幸廷尉籍坊二獄引見諸囚詔隨輕重決遣以赴耕耘甲申賜天下貧人一戶之內無雜財穀帛者稟一年六月丁卯以澍雨大洽曲赦京師秋七月辛亥

行幸太山壬子詔會京師耆老賜錦綵衣服几杖稻米蜜麪復家人不徭役閏月丁亥幸獸圈親錄囚徒輕者皆免之壬辰頓丘王李鍾葵有罪賜死八月乙酉詔諸州置水室九月乙亥思義殿成壬午東明觀成戊子詔曰隆寒雪降可遣侍臣詣廷尉獄及囚所察饒寒者給以衣食桎梏者代以輕鎖是歲郡鎮十八水旱人饑詔開倉振恤蠕蠕悉萬斤等國並遣使朝貢

五年春正月己卯南巡丁亥至中山親見高年問人疾苦二月辛卯朔大赦賜孝悌力田孤貧不能自存者穀帛各有差免宮人之老者還其親丁酉至信都存問如中山癸卯還中山己酉講武于唐水之陽庚戌車駕還宮沙門法秀謀反伏誅假梁郡王嘉大破齊俘獲三萬餘口送京師三月辛酉朔幸肆州癸亥講武于雲水之陽所經考察守宰黜陟之己巳車駕還宮詔曰法秀妖詐亂常

妄說符瑞蘭臺御史張求等一百餘人招結奴隸謀爲大逆有司
科以族誅誠合刑憲但矜愚重命猶所不忍其五族者降止同祖
三族止一門門誅止身夏四月己亥行幸方山建永固石室於山
立碑焉銘太皇太后終制于金冊又起鑿玄殿甲寅以旱故詔所
在掩骸骨祈禱神祇任城王靈薨五月庚申以農月時要詔天下
勿使有留獄六月甲辰中山王叡薨戊午封皇叔簡爲齊郡王猛
爲安豐王秋七月庚申朔日有蝕之甲子齊人來聘九月庚午閱
武於南郊大饗羣臣齊使車僧朗以班在宋使殷靈誕後辭不就
席宋降人解奉君刃僧朗於會中詔誅奉君等乙亥封昌黎王馮
熙世子誕爲南平王冬十二月癸巳州鎮十二饑詔開倉振恤是
歲鄧至蠕蠕等國並遣使朝貢

六年春正月甲戌大赦二月辛卯詔以靈丘郡土旣徧墾又諸州

路衝復其人租十五年癸巳白蘭王吐谷渾翼世以誣罔伏誅乙
未詔曰蕭道成逆亂江淮戈旗頻舉七州之人旣有征運之勞深
乖輕徭之義其復常調三年癸丑賜王公已下清勤著稱者穀帛
有差三月庚辰幸獸圈詔曰武狼猛暴食肉殘生從今勿復捕貢
辛巳幸武州山石窟寺賜貧老衣服是月齊高帝殂夏四月甲辰
賜畿內鰥寡孤獨不能自存者粟帛各有差秋七月發州郡五萬
人修靈丘道八月癸未朔分遣大使巡行天下遭水之處丐其租
賦貧儉不自存者賜以粟帛庚子罷山澤禁九月辛酉以氐楊後
起爲武都王是歲地豆干吐谷渾等國並遣使朝貢

七年春正月庚申詔曰朕每思知百姓疾苦以增修寬政故具問
守宰苛虐之狀於州郡使者今秀孝計掾對多不實甚乖朕虛求
之意宜案以大辟明罔上必誅然情猶未忍可恕罪聽端申下天

下使知後犯無恕丁卯詔青齊光東徐四州戶運倉粟一十萬石
送瑛丘琅邪復租竿一年三月甲戌以冀定二州饒詔郡縣爲粥
於路以食之又弛關津之禁夏四月庚子幸崞山賜所過鰥寡不
能自存者衣服粟帛壬寅車駕還宮閏月癸丑皇子生大赦六月
定州上言爲粥所活九十四萬七千餘口秋七月甲申詔假員外
散騎常侍李彪使於齊改封濟南王羅拔爲趙郡王九月壬寅詔
求讜言冀州上言爲粥所活七十五萬一千七百餘口冬十月戊
午皇信堂成十一月辛丑齊人來聘十二月乙巳朔日有蝕之癸
丑詔曰夏殷不嫌一族之婚周世始絕同姓之娶斯皆教隨時設
政因事改者也皇運初基日不暇給古風遺樸未遑釐改自今悉
禁絕之有犯者以不道論庚午開林慮山禁與人共之州鎮十三
飢詔開倉振恤

八年春正月詔隴西公琛尚書陸叡爲東西二道大使褒善罰惡
夏五月己卯詔振賜河南七州戍兵甲申詔員外散騎常侍李虎
使於齊六月丁卯詔曰置官班錄行之尚矣自中原喪亂茲制中
絕先朝因循未遑釐改朕顧憲章舊典始班俸祿罷諸商人以簡
人事戶增調三匹穀二斛九升作以爲官司之祿均預調爲二匹之
賦卽兼商用雖有一時之煩終克永逸之益祿行之後賦滿一匹
者死變法改度宜爲更始其大赦天下與之惟新戊辰武州水壞
人居秋八月甲辰詔以班制俸祿更興刑書寬猛未允人或異議
制百辟卿士工商吏人各上便宜勿有所隱九月甲午齊人來聘
戊戌詔俸十月爲首每季一請於是內外百官受祿有差冬十一
月乙未詔員外散騎常侍李彪使於齊十二月州鎮十五水旱人饑
詔使者開倉振恤是歲蠕蠕高麗等國各遣使朝貢

九年春正月戊寅詔禁圖讖祕緯及名孔子閉房記留者以大辟論又諸巫覡假稱神鬼妄說吉凶及委巷諸非墳典所載者嚴加禁斷癸未大饗羣臣于太華殿班賜皇詔二月己亥大制皇子封王者皇孫皇曾孫紹封者皇女封者歲祿各有差封廣陽王建第二子嘉爲廣陽王乙巳詔百辟卿士工商吏人各上書極諫靡有所隱三月景申封皇弟禧爲咸陽王幹爲河南王羽爲廣陵王雍爲潁川王總爲始平王詳爲北海王夏五月齊人來聘秋七月景午朔新作諸門癸未遣使拜宕昌王梁彌機兄子彌承爲宕昌王八月庚申詔曰數州災水飢饉荐臻民有賣鬻男女者天譴在予一人百姓橫罹艱毒今自太和六年已來買定冀幽相四州饑人良口者盡還所親雖娉爲妻妾遇之非理情不樂者亦離之冬十月丁未詔使者循行州郡與牧守均給天下之田還受以生死爲斷

勸課農桑興富人之本辛酉司徒魏郡王陳建薨詔員外散騎常侍李彪使於齊十二月乙卯以待中淮南王他爲司徒是歲京師及州鎮十三水旱傷稼宕昌高麗吐谷渾等國並遣使朝貢十年春正月癸亥朔帝始服袞冕朝饗萬國二月甲戌初立黨里隣三長定人戶籍三月庚戌齊人來聘夏四月辛酉朔始制五等公服甲子帝初法服御輦祀西郊六月己卯各皇子曰恂大赦秋八月乙亥給尚書五等品爵已上朱衣玉珮大小組綬九月辛卯詔起明堂辟雍冬十月癸酉有司議依故事配始祖於南郊十一月議定州郡縣官依口給俸十二月乙酉汝南潁川饑詔巧人田租開倉振恤是歲蠕蠕高麗吐谷渾勿吉等國並遣使朝貢十一年春正月丁亥朔詔定樂章非雅者除之二月甲子肆州之雁門及代郡人饑詔開倉振恤夏五月癸巳南平王渾薨甲午詔

復七廟子孫及外戚總服已上賦役無所與六月辛巳秦州人饑
詔開倉振恤秋七月巳丑詔今年穀不登聽人出關就食遣使者
造籍分遣去留所在開倉振恤八月壬申蠕蠕犯塞遣平原王陸
獻討之庚辰大議北伐辛巳罷山北苑以其地賜貧人冬十月辛
未詔罷起部無益之作出官人不執機杼者甲戌詔曰鄉飲之禮
廢則長幼之序亂孟冬十月人閑歲隙宜於此時導以德義可下
諸州黨里之內推賢而長者教其里人父慈子孝兄友弟順夫和
妻柔不率長教者具以名聞十一月丁未詔罷尚方錦綉綾羅之
工百姓欲造任之無禁其御府衣服金銀珠玉綾紬錦太官雜器
太僕乘具內庫弓矢出其大半班賚百官及京師人庶下至工商
皂隸逮於六鎮戍士各有差戍申詔今寒氣勁切杖箠難任自今
月至來年孟夏不聽拷問罪人又歲饑輕囚宜速決了無令薄罪

久留獄狂十二月詔祕書丞李彪著作郎崔光改析國記依紀傳
體是歲大饑詔到在開倉振恤吐谷渾高麗悉萬斤等國並遣使
貢

十二月春正月辛巳朔初建五牛旌旗乙未詔鎮戍流徙之人年
滿七十孤單窮獨無成人子孫旁無暮親者具狀以聞二月辛亥
朔日有蝕之三月丁亥中散梁衆保等謀反伏誅夏四月甲子大
赦已巳齊將陳顯達攻陷豐陽長樂王穆亮率騎討之五月丁酉
詔六鎮雲中河西及關內郡各修水田通渠溉灌壬寅增置葵器
於太廟秋九月甲午詔曰日蝕修德月蝕修刑廼者癸巳夜月蝕
盡公卿已下宜慎刑罰以答天意丁酉起宣文堂經武殿癸卯淮
南王他薨冬閏十月甲子帝觀築圓丘于南郊十一月雍豫二州
人饑詔開倉振恤梁州刺史臨淮王提坐貪縱配北鎮是歲高麗

石昌吐谷渾勿吉武興等國並遣使朝貢

十三年春正月辛亥祀圓丘初備大駕乙丑兗州人王伯恭聚衆勞山自稱齊王東萊鎮將孔伯孫討斬之戊辰齊人寇邊淮南太守王僧雋擊走之二月庚子引羣臣訪政道得失損益之宜三月夏州刺史章武王彬以貪財削封夏四月丁丑詔曰升樓散物以賚百姓至使人馬騰踐多有毀傷今可斷之以本所費之物賜窮老貧獨者州鎮十五大饑詔所在開倉振恤五月庚戌祀方澤六月汝陰王天賜南安王禎並坐贓賄免爲庶人秋七月立孔子廟於京師八月乙亥詔兼員外散騎常侍邢產使於齊九月出宮人賜北鎮人貧鰥者冬十一月己未安豐王猛薨十二月景子司空河東王苟頽薨甲午齊人來聘己亥以尚書令尉元爲司徒左僕射穆亮爲司空是歲高麗吐谷渾陰平中赤武興石昌等國各遣

使朝貢

十四年春正月己巳朔日有蝕之三月戊寅初詔定起居注制詔遣侍臣巡行州郡問人疾苦夏四月地豆干頻犯塞甲戌征西大將軍陽平王熙擊走之甲午詔兼員外散騎常侍邢產使于齊五月己酉庫莫奚犯塞安州都將樓龍兒擊走之沙門司馬御惠自言聖王謀破平原郡禽獲伏誅秋七月甲辰詔罷都牧雜制八月詔議國之行次九月癸丑太皇太后馮氏崩詔聽藩鎮曾經內侍者前後奔赴冬十月戊辰詔將親侍龍輿奉訣陵隧諸常從之具悉可停之其武衛之官防侍如法癸酉葬文明太皇太后於永固陵甲戌車駕謁永固陵羣臣固請公除帝不許己卯車駕謁永固陵庚辰帝居廬引見羣寮於太和殿太尉東陽王丕等據權制因請帝引古禮往復羣臣乃止京兆王太興有罪免官削爵詔曰公

卿屢依金冊遺旨中代權制式請過葬卽吉朕思遵遠古終三年之制依禮既虞卒哭此月二十一日授服以葛易麻旣以衰服在上公卿不得獨釋於下故於朕之授服變從練禮已下復爲節降斟酌古今以制厥衷且取遺旨速除之一端粗申臣子罔極之巨痛癸未詔曰朕遠遵古式欲終三年之禮百辟羣臣據金冊顧命將奪朕心從先朝之制朕仰惟金冊俯自推省取諸二衷不許衆議以衰服過期終四節之慕又奉遵聖訓聿修誥旨不敢暗默自居以曠機政庶不憊遺令之意差展哀慕之情並下州鎮長至三元絕告慶之禮甲申車駕謁永固陵十一月甲寅詔內外職人先朝班次及諸方雜客冬至之日盡聽入臨三品已下衰服者至夕復臨其餘唯旦臨而已其拜哭之節一依別儀丁巳齊人來聘十二月壬午詔依準丘井之式遣使與州郡宣行條制隱口漏可卽

聽附實若朋附豪勢陵抑孤獨罪有常刑是歲吐谷渾宕昌武興陰平高麗等國並遣使朝貢

十五年春正月丁巳帝始聽政於皇信東室初分置左右史官癸亥晦日有蝕之二月巳丑齊人來聘三月甲辰車駕謁永固陵夏四月癸亥帝始進蔬食乙丑謁永固陵自正月不用至于癸酉有司奏祈百神詔曰何宜四氣未周使行禮事唯當考躬責已以待天譴甲戌詔員外散騎常侍李彪使于齊巳卯經始明堂改營太廟五月巳亥議改律令於東明觀折疑獄乙卯枹罕鎮將長孫百年攻吐谷渾所置洮陽泥和二戍尅之俘獲三萬餘人詔悉免歸景辰詔造五輅六月丁未濟陰王鬱以貪殘賜死秋七月乙丑謁承固陵規建壽陵巳卯詔議祖宗以道武皇帝爲太祖乙酉車駕巡省京邑聽訟而還八月壬辰議養老又議肆類上帝禋于六宗

禮帝親臨決詔郡國有時物可以薦宗廟者貢之戊戌移道壇於桑乾之陰改曰崇虛寺己亥詔諸州舉秀才先盡才學乙巳親定禘祫禮丁巳議律令事仍省雜祀九月辛巳齊人來聘冬十月庚寅車駕謁永固陵是月明堂太廟成十一月丁卯遷七廟神主於新廟乙亥大定官品戊寅考諸牧守詔假通直散騎常侍李彪聘於齊景戌初罷小歲賀丁亥詔二千石考上上者假四品將軍賜乘黃馬一匹上中者五品將軍上下者衣一襲十二月壬辰遷社於內城之西癸巳班賜刺史已下衣冠以安定王休爲太傅齊郡王簡爲太保帝爲高麗王璉舉哀於城東行宮己酉車駕迎春於東郊辛卯詔簡選樂官是歲吐谷渾悉萬斤高麗鄧至宕昌等國並遣使朝貢

十六年春正月戊午朔朝饗羣臣於太華殿帝始爲王公興縣而不樂己未宗祀顯祖獻文皇帝於明堂以配上帝遂升臺以觀雲物降居青陽左个布政事每朔依以爲常辛酉始以太祖配南郊壬戌詔定行次以水承金甲子詔罷袒裸乙丑制諸遠屬非太祖子孫及異姓爲王者皆降爲公公爲侯侯爲伯子男仍舊皆除將軍之號戊辰帝臨思義殿策問秀孝景子始以孟月祭廟二月戊子帝移御永樂宮庚寅壞太華殿經始太極殿辛卯罷寒食享壬辰辛北部曹歷觀諸省巡省京邑聽理冤訟甲午車駕初朝日于東郊遂以爲常丁酉詔祀唐堯於平陽虞舜於廣甯夏禹於安邑周文於洛陽丁未改謚宣尼曰文聖尼父告謚孔廟二月丁卯巡省京邑癸酉省西郊郊天雜事乙亥車駕初迎氣於南郊自此爲常辛巳以高麗王璉孫雲爲其國王齊人來聘夏四月丁亥朔頒新律令大赦甲寅幸皇宗學親問博士經義五月癸未詔羣臣於

皇信堂更定律條流徒限制帝親臨決之秋七月壬戌詔曰自今
選舉每以季月本曹與吏部銓簡甲戌詔兼員外散騎常侍宋弁
使於齊八月庚寅車駕初祀夕月於西郊遂以爲常乙未詔陽平
王頤左僕射陸叡督十二將北討蠕蠕景午宕昌王梁彌承來朝
司徒尉元以老遜位己酉以尉元爲三老游明根爲五更又養國
老庶老將行大射之禮雨不克成癸丑詔曰國家雖宗文以懷九
服修武以寧八荒然於習武之方猶爲未盡將於馬射之前先行
講武之式可敕有司豫修場埒其列陣之儀五戎之數別俟後敕
九月甲寅朔大序昭穆於明堂祀文明太皇太后於玄堂辛未帝
以文明太皇太后再周忌日哭於陵左絕膳三日哭不輟聲辛巳
武興王楊集始來朝冬十月己亥以太傅安定王休爲大司馬特
進馮誕爲司徒甲辰詔以功臣配饗太廟庚戌太極殿成饗羣臣

十一月乙卯依古六寢權制二室以安昌殿爲內寢皇信堂爲中
寢四下爲外寢十二月賜京邑老人鳩杖齊人來聘是歲高麗鄧
至契丹靺鞨吐谷渾等國並遣使朝貢

十七年春正月壬子朔饗百寮於太極殿乙丑詔大賜諸蕃君長
車旗衣馬錦綵繒纈多者一千少者三百各以命數爲差詔兼員
外散騎常侍邢巒使於齊景子以吐谷渾伏連壽爲其國王庚辰
蜀大司馬安定王休太保齊郡王簡朔望之朝二月乙酉詔賜議
律令之官各有差已酉車駕始藉田於都南三月戊辰改作後宮
夏四月戊戌立皇后馮氏是月齊直閣將軍蠻酋田益宗率部落
內屬五月壬戌宴四廟子孫於宣文堂帝親與之齒行人禮甲
子帝臨朝堂引見公卿以下決疑政錄囚徒丁丑以旱徹膳襄陽
蠻酋雷婆思等率其部內徙居於太和川六月庚辰朔日有蝕之

景成帝將南伐詔造河橋乙未講武乙巳詔曰比百秩雖陳事典未叙自八元樹位躬加省覽作職員令二十一卷事迫戎期未善周悉須待軍回更論所關權可付外施行立皇子恂爲皇太子秋七月癸丑以皇太子立詔賜人爲父後者爵一級爲公士曾爲吏屬者爵二級爲上造鰥寡孤獨不能自存者人粟五斛戊午中外戒嚴是月齊武帝殂八月乙酉三老山陽郡公尉元薨景成車駕類於上帝遂臨尉元喪丁亥帝辭永固陵己丑發京師南伐步騎三十餘萬太尉不奏請以宮人從詔以臨戎不語內事不許壬寅車駕至肆州人年七十以上賜爵一級路見眇跛停駕親問賜衣食復終身戊申幸并州親見高年問疾苦九月壬子詔兼員外散騎常侍高聰聘於齊丁巳詔車駕所經傷人秋稼者畝給穀五斛戊辰濟河詔洛懷并肆所過四州賜高年爵恤鰥寡孤獨各有差

孝悌廉義文武應求者皆以名聞又詔廝養戶不得與庶士婚有文武之才積勞應進者同庶族例聽之庚午幸洛陽周巡故宮基跡帝顧謂侍臣曰晉德不修荒毀至此遂詠黍離詩爲之流涕壬申觀河橋幸太學觀石經景子六軍發軔丁丑帝戎服執鞭御馬而出羣臣稽顙於馬前請停南伐帝乃止仍議遷都計冬十月戊寅朔幸金墉城詔徵司空穆亮與尚書李冲將作大匠董爵經始洛京己卯幸河南城乙酉幸豫州癸巳次於石濟乙未解嚴設壇於滑臺宮詔京師及諸州從戎者賜爵一級應募者加二級主將加三級癸卯幸鄴城乙巳詔安定王休率從官迎家口於代車駕送於漳水上初帝之南伐起宮殿於鄴西十一月癸亥宮成徙御焉十二月戊寅巡省六軍乙未詔隱恤軍士死亡疾病務合優給是歲勿吉吐谷渾宕昌陰平契丹庫莫奚高麗鄧至等國並遣使

朝貢

十八年春正月丁未朔朝羣臣於鄴宮澄鸞殿癸亥南巡詔相充
豫三州賜高年爵恤鰥寡孤老各有差孝悌廉義文武應求者皆
以名聞戊辰經殷北干墓祭以大牢乙亥幸洛陽西宮二月己丑
行幸河陰規建方澤之所景申徙封河南王幹爲趙郡王潁川王
雍爲高陽王壬寅北巡癸卯齊人來聘甲辰詔喻天下以遷都意
閏月癸亥次勾注陞南皇太子朝于蒲地壬申至平城宮癸酉臨
朝堂部分遷留甲戌謁永固陵三月庚辰罷西郊祭壬辰帝臨
太極殿喻在代羣臣遷移之略夏五月甲戌朔日有蝕之乙亥詔
罷五月五日七月七日饗六月己巳詔兼員外散騎常侍盧昶使
於齊秋七月乙亥以宋王劉昶爲大將軍壬辰北巡戊戌謁金陵
辛丑幸朔州是月齊蕭鸞殺其主昭業八月癸亥皇太子朝於行

宮甲辰行幸陰山觀雲川丁未幸閱武臺臨觀講武因幸懷朔武
川撫冥柔玄等四鎮乙丑南還所過皆親見高年問人疾苦貧窘
孤老者賜以粟帛景寅詔六鎮及禦夷城人年老孤貧廢疾者賜
粟有罪各有差戊辰車駕次旋鴻池庚午謁永固陵辛未還平城
宮九月壬申朔詔曰三載考績自古通經三考黜陟以彰能否朕
今三載一考考卽黜陟欲令愚滯無妨於賢者才能不擁於下位
各令當曹考其優劣爲三等六品以下尚書重問五品已下朕將
親與公卿論其善惡上上者遷之天下者黜之中中者守其本任
壬午帝臨朝堂親加黜陟壬辰陰平王陽炅來朝冬十月甲辰以
太尉東陽王丕爲太傅戊申親告太廟奉迎神主辛亥車駕發平
城宮壬戌次於中山之唐湖乙丑分遣侍臣巡問疾苦己巳幸信
都庚午詔曰比聞緣邊之蠻多有竊掠致有父子乖離室家分絕

可詔荆郢東荆三州勒諸蠻人勿有侵暴是月齊蕭鸞殺其主昭
文而自立十一月辛未朔詔冀定二州賜高年爵恤鰥寡孤老各
有差孝義廉貞文武應求者具以名聞丁丑幸鄴甲申經比干墓
親爲吊文樹碑刊之己丑車駕至洛陽十二月辛丑朔分命諸將
南征壬寅革衣服之制癸卯詔中外戒嚴戊申復代遷戶租賦三
歲己酉詔王公伯子男開國食邑者王食半公三分食一侯伯四
分食一子男五分食一辛亥車駕南伐丁卯詔郢豫二州賜高年
爵恤孤寡鰥老各有差緣路之丁復田租一歲孝悌廉貞文武應
求者具以名聞戊辰車駕至懸瓠己巳詔壽陽鍾離馬頭之師所
獲男女口皆放還南是歲高麗國遣使朝貢

十九年春正月辛未朔朝饗羣臣於懸瓠癸酉詔禁淮北人不得
侵掠犯者以大辟論壬午講武於汝水西大賚六軍平南將軍王
肅左將軍元麗並大破齊軍己亥車駕濟淮二月甲辰幸人公山
路中雨甚詔去蓋見軍士病者親隱恤之戊申車駕巡淮南東人
皆安堵租運屬路景辰幸鍾離戊午軍士禽齊人三千帝曰在君
爲君其人何罪於是免歸辛酉發鍾離將臨江水司徒馮誕薨壬
戌詔班師丁卯遣使臨江數齊王罪惡三月戊子太師馮熙薨夏
四月丁未曲赦徐豫二州其運轉之士復租三年辛亥詔賜高年
爵恤孤寡老疾各有差德著丘園者具以名聞齊人降者給復十
五年癸丑幸小沛使以太牢祭漢高祖廟己未幸瑕丘使以太牢
祠岱嶽詔宿衛武官增位一級庚申幸魯城親祠孔子廟辛酉詔
拜孔氏四人顏氏二人爲官詔兗州刺史舉部內士人堪軍國及
守宰政績者具以名聞詔賜兗州人爵及粟帛如徐州又詔選諸
孔宗子一人封崇聖侯邑一百戶以奉孔子祀命兗州爲孔子起

園栢修飾墳隴更建碑銘褒揚聖德戊辰行幸碣磬太和廟成五月巳巳城陽王鸞赭陽失利降爲定襄縣王廣川王諧薨庚子遷文成皇后馮氏神主於太和廟甲戌行幸滑臺景子次于石濟庚辰皇太子朝於平桃城癸未車駕至自南伐甲申減閑官祿以裨軍國之用乙酉行飲至禮班賜各有差甲午皇太子冠於廟六日巳亥詔不得以北俗之語言於朝廷違者免所居官辛丑詔復軍士從駕渡淮者租賦三年癸卯詔皇太子赴平城宮壬子詔濟州東郡滎陽及河南諸縣車駕所經者賜高年爵恤孤寡老疾各有差孝悌廉義文武應求者具以名聞癸丑求天下遺書秘閣所無有裨時用者加以厚賞乙卯曲赦梁州復人田租三歲景辰詔遷洛人死塋河南不得還北於是代人南遷者悉爲河南洛陽人戊午詔改京師大斗衣周禮制度班之天下秋八月幸西宮路見瓌

塚露棺駐輦埋之乙巳詔選天下勇士十五萬人爲羽林武賁以充宿衛丁巳詔諸從兵從征被傷者皆聽還本金墉宮成甲子引羣臣歷宴殿堂九月六宮及文武盡遷洛陽景戌行幸鄴丁亥詔諸墓舊銘記見存昭然爲時人所知者三公及位從公者去墓三十步尚書令僕九列十五步黃門五校十步各不聽墾俎壬辰遣黃門郎以太牢祭比干墓乙未車駕還宮冬十月甲辰曲赦相州賜高年爵恤孤老痼疾各有差景辰車駕至自鄴辛酉詔州郡舉士壬戌詔諸州牧考屬官爲三等之科以聞將加親覽以定升降詔徐兗光南青荆洛六州嚴纂戎備應須赴集十一月行幸委粟山議定圓丘甲申祀圓丘景戌大赦十二月乙未朔引見羣臣光極堂宣下品令爲大選之始辛酉以咸陽王禧爲長兼太尉復前安南王禎本爵甲子引見羣臣光極堂班賜冠服是歲高麗鄧至

吐谷渾等國各遣使朝貢

二十年春正月丁卯詔改姓元氏壬辰封始平王勰爲彭城王復封定襄王鸞爲城陽王二月辛丑幸華林聽訟於都亭壬寅詔自非金革皆聽終三年喪景午詔畿內七十已上暮春赴京師將行養老禮庚戌幸華林聽訟於都亭癸丑詔介山之邑聽爲寒食自餘禁斷三月景寅宴羣臣及國老庶老於華林園詔國老黃耆以上假中散大夫郡守耆年以上假給事中縣令庶老直假郡縣各賜鳩杖衣裳丁丑詔諸州中正各舉其鄉人望年五十已上守素衡門者授以令長夏五月景子詔敦勸農功令畿內嚴加課督墮業者申以楚撻力田者具以名聞景戌初營方澤於河陰遣使以太牢祭漢光武及明章三帝陵又詔漢魏晉諸帝陵各禁方百步不得樵蘇踐藉丁亥祀方澤秋七月廢皇后馮氏戊寅帝以久旱

咸秩羣神自癸未不食至于巳酉是夜澍雨大洽八月壬辰朔幸華林園親錄囚徒咸降本罪二等決遣之丁巳南安王禎薨幸華林園聽訟九月戊辰車駕閱武于小平津癸酉還宮丁亥將通洛水八穀帝親臨觀庚寅晦日有蝕之冬十月戊戌以代遷之士皆爲羽林武賁司州之人十二夫調一吏爲四年更卒歲開番假以佚公私力役巳酉曲赦京師十一月乙酉復封前汝陰王天賜孫景和爲汝陰王前京兆王大興爲西河王十二月甲子以西北州郡旱儉遣侍臣巡察開倉振恤乙丑開鹽池禁景寅廢皇太子恂爲庶人戊辰置常平倉樂陵王思譽知恒州刺史穆泰謀反不告削爵爲庶人

二十一年春正月景申立皇子恪爲皇太子賜天下爲父後者爵二級巳亥遣侍臣巡方省察問人疾苦黜陟守宰乙巳北巡二月

壬戌次於太原親見高年問所不便乙丑詔并州士人年六十已上假以郡守先是定州人王金鈞訛言自稱應王景寅州郡捕斬之癸酉車駕至平城甲戌謁永固陵乙未南巡甲寅詔汾州賜高年爵各有差景辰次平陽使以太牢祭唐堯夏四月庚申幸龍門使以太牢祭夏禹癸亥幸蒲坂使以太牢祭虞舜修堯舜夏禹廟辛未幸長安壬申武興王楊集始來朝乙亥親見高年問所疾苦景子遣侍臣分省縣邑振賜穀帛戊寅幸未央殿阿房宮遂幸昆明池癸未宋王劉昶薨景戌使以太牢祀漢帝諸陵五月丁亥朔衛大國遣使朝貢己丑車駕東旋汎渭入河庚寅詔雍州士人百一年以上假華郡太守九十以上假荒郡八十已上假華縣七十已上假荒縣庶老以年各減一等七十已上賜爵三級其營船夫賜爵一級孤寡鰥貧各賜穀帛其孝友德義文武才幹悉仰貢舉壬

辰使以太牢祭周文王於鄴祭周武王於鎬癸亥遣使祭華岳六月庚申車駕至自長安壬戌詔冀定瀛相濟五州發卒士二十萬將以南討癸亥司空穆亮遜位秋七月甲午立昭儀馮氏爲皇后甲寅帝親爲羣臣講喪服於清徽堂八月景辰詔中外戒嚴壬戌立皇子愉爲京兆王懌爲清河王懷爲廣平王戊辰講武於華林園庚辰車駕南討九月景申詔司州洛陽人年七十以上無子孫六十以上無暮親貧不自存者給以衣食及不滿六十而有廢癘之疾無大功親窮困無以自療者皆於別坊遣醫救護給大醫師四人豫請藥物療之辛丑帝留諸將攻赭陽引師南討丁未車駕發南陽留太尉咸陽王禧前將軍元英攻之己酉車駕至新野冬十月丁巳四面進攻不尅詔左右軍築長圍以守之乙亥追廢貞皇后林氏爲庶人十一月丁酉大破齊軍於沔北於是人皆復業

九十以上假以郡守六十五以上假以縣令十二月丁卯詔流徒之囚皆勿決遣登城之際令其先鋒自効庚午車駕臨河遂東還戊寅還新野己卯親行營壘恤六軍以齊郡王子琛紹河間王若後高昌國遣使朝貢

二十二年春正月癸未朔饗羣臣於新野行宮丁亥拔新野斬其太守劉忌於宛庚午至自新野辛未詔以穰人首歸大順始終若一者給復三十年標其所居曰歸義鄉次降者給復十五年三月壬午朔大破齊將崔惠景蕭衍軍於鄧城庚寅行幸樊城觀兵襄沔耀武而還曲赦二荆魯陽辛亥行幸懸瓠夏四月趙郡王幹薨秋七月壬午詔后之私府損半六宮嬪御五服男女恒恒供亦令減半在戎之親三分省一以供賞是月齊明帝殂八月辛亥皇太子自京師來朝壬戌高麗國遣使朝貢九月己亥帝以禮不伐

喪詔及師景午車駕發懸瓠冬十月己酉朔曲赦二豫州殊死已下復人田租一歲十一月辛巳幸鄴

二十三年春正月戊寅朔朝饗羣臣於鄴先是帝不豫至是有瘳庚辰羣臣上壽大饗於澄鸞殿壬午幸西門豹祠遂歷漳水而還戊戌車駕至自鄴癸卯行飲至策勳之禮甲辰大赦太保齊郡王簡薨二月辛亥以長兼太尉咸陽王禧爲太尉癸亥以中軍大將軍彭城王勰爲司徒復樂陵王思譽本封癸酉齊將陳顯達攻陷馬圈戎三月庚辰車駕南伐癸未次梁城景成帝不豫丁酉車駕至馬圈戊戌頻戰破之己亥收其戎資億計諸將追奔漢水斬獲及赴水死者十八九庚子帝疾甚車駕北次穀塘原甲辰詔賜皇后馮氏死詔司徒勰徵太子於魯陽踐阼以北海王詳爲司空王肅爲尚書令廣陽王嘉爲左僕射尚書宋弁爲吏部尚書與太尉

咸陽王禧右僕射任城王澄等六人輔政夏四月景午朔帝崩于穀塘原之行宮時年三十三祕諱至魯陽發喪還京師上謚曰孝文皇帝廟曰高祖五月景申葬長陵帝幼有至性年四歲時獻文患雍帝親自吮膿五歲安禪悲泣不自勝獻文問其故對曰代親之感內切於心獻文甚歎異之文明太后以帝聰聖後或不利馮氏將謀廢帝乃於寒月單衣閉室絕食三朝召咸陽王禧將立之元丕穆泰李冲固諫乃止帝初不有憾唯深德丕等撫念諸弟始終曾無纖介悖睦九族禮敬俱深雖於大臣持法不縱然性寬慈進食者曾以熱羹覆帝手又曾於食中得蟲穢物並笑而恕之宦者先有譖帝於太后太后杖帝數十帝默受不自申明太后崩後亦不以介意聽覽政事從善如流哀矜百姓恒思所以濟益天地五郊宗廟二分之禮常必躬親不以寒暑爲倦尚書奏案多自尋

省百官大小無不留心務於周洽每言凡爲人君患於不均不能推誠遇物苟能均誠胡越之人亦可親如兄弟常從容謂史官曰直書時事無諱國惡人君威福自己史復不書將何所懼南北征巡有司奏請修道帝曰粗修橋梁通輿馬便止不須去草刻令平也凡所修造不得已而爲之不爲不急之事重損人力巡幸淮南如在內地軍事須伐人樹者必留絹以酬其直人苗稼無所傷踐諸有禁忌禳厭之方非典籍所載者一皆除罷雅好讀書手不釋卷五經之義覽之便講學不師受探其精奧史傳百家無不該涉善談莊老尤精釋義才藻富贍好爲文章詩賦銘頌在興而作有大文筆馬上口授及其成也不改一字自太和十年已後詔冊皆帝文也自餘文章百有餘篇愛奇好士情如饒渴待納朝賢隨才輕重常寄以布素之意悠然玄邁不以世務嬰心又少善射有督

力年十餘能以指彈碎羊髀骨射禽獸莫不隨行所至而斃之至十五便不復殺生射獵之事悉止性儉素常服澣濯之衣鞍勒鐵木而已帝之雅志皆此類也

論曰有魏始基代朔廓平南夏闢土經世咸以威武爲業文教之事所未遑也孝文纂承洪緒早著獻聖之風時以文明攝事優游恭已玄覽獨得著自不言神契所擿固以符於冥化及躬總大政一日萬機十許年間曾不暇給殊塗同歸百慮一致夫生靈所難行人倫之高迹雖尊居黃屋盡蹈之矣若乃欽明稽古協御天人帝王制作朝野軌度斟酌用舍煥乎其有文章海內黔黎咸受耳目之賜加以雄才大略愛奇好士視下如傷役已利物亦無得而稱之其經緯天地豈虛謚也

北史卷三

魏本紀第三

終

